

萬 有 文 庫

第 一 集 一 千 種


王 雲 五 主 編

陸 放 翁 集

( 二 十 )

陸 游 著

商 務 印 書 館 發 行



陸放翁集

(二十)

陸游著

國學基本叢書

# 陸放翁集

## 劍南詩藁

### 卷第十八

丙午五月大雨五日止鏡湖渺然想見湖未廢時有感而賦

朝雨暮雨梅正黃。城南積潦入車箱。鏡湖無復鍼青秧。直浸山脚白茫茫。湖三百里漢訖唐。千載未嘗廢。陂防屹如長城限。胡羌。嗇夫有秩走且僵。旱年灌注水何傷。越民歲歲常豐穰。洸湖誰始謀不臧。使我婦子饜糟糠。陵遷谷變亦何常。會有妙手開湖光。蒲魚自足被四方。煙艇滿目菱歌長。

### 遊鄞

晚雨初收旋作晴。買舟訪舊海邊城。高帆斜挂夕陽色。急艫不聞人語聲。掠水翻翻沙鷺過。供廚片片雪鱗明。山川不與人俱老。更幾東來了此生。

### 泊上虞縣

鄞江久不到。乘興偶東遊。漲水崩沙岸。歸雲抱縣樓。吟餘聲混混。梳罷髮飈飈。喜見時平象。新絲入市稠。

### 發丈亭一作長亭

姚江乘潮潮始生。長亭却趁落潮行。參差鄰舫一時發。臥聽滿江柔艫聲。

又

玄雲垂天暗如漆。鱗聲嘔札知船行。南風忽起卷雲去。江月已作金盆傾。

明州

豐年滿路笑歌聲。蠶麥俱收穀價平。村步有船銜尾泊。江橋無柱架空橫。海東估客初登岸。雲北山僧遠入城。仗錫平老出山來迎予。風物可人吾欲住。擔頭蕪菜正堪烹。

水亭獨酌十二韻

清風掃鬱蒸。爽氣生戶牖。客中淡無事。翛然一盃酒。書生拙自料。事業期不朽。少年忝朝跡。蹭蹬今白首。歷觀千載事。和戎固嘗有。定襄伍原間。乃可畫地守。神州在何許。東巡已去久。煌煌一統業。謨訓共可負。太祖嘗書大宋一統字。以賜王溥。荆楚多劍客。宣潤富弩手。孰能用其長。坐使老農畝。講武幸長楊。勞軍臨細柳。中興望聖時。未死得見否。

坐客有談狄魚眼。匪之美者。感歎而作

黃雀頭顱羞五鼎。狄魚眼。匪參雋永。兩螯何鼻蟹。喪軀一櫛可憐。牛斷領。霜刀斫膾。幾許痛。公子方誇醉魂醒。物生怖死與我均。礪几流丹只俄頃。哀哉堂堂七尺身。正坐舌端成業境。豪華只可誇僕妾。報應那知類形影。世間擾擾何時了。一念超然差若穎。不妨瓦鉢飽晚菘。更汲山泉試春茗。

衰病不復能劇飲。而多不見察。戲作此詩

平生不持面看人。寧作五湖雲水身。忍窮閉門豈自苦。是中有味敵八珍。酒盃激盪鼓吹作。我自悲吒人自樂。更闌坐睡不得去。如鷹在韝虎遭縛。丈夫歡樂自有時。遇酒先怯非予衰。萬騎擊胡青海岸。此時意

氣令君看

或以予辭酒爲過復作長句

陸生酒戶如蠡迤。痛酒豈能堪大白。正緣一快敗萬事。往往吐茵仍墮幘。爾來人情甚不美。似欲殺我以麩蘖。滿傾不許計性命。傍晚更復騰頰舌。醉時狂呼不復覺。醒後追思空自責。卽今願與交舊約。三爵甫過當亟徹。解衣摩腹午窗明。茶磴無聲看霏雪。

行路難

平生結交無十人。與君契合懷抱真。春遊有時馬忘秣。夜話不覺雞報晨。極知貧賤別離苦。明日有懷就誰語。人無根柢似浮萍。未死相逢在何許。道邊日斜泣相持。旗亭取醉不須辭。君貴堂廚萬錢食。我勸一盃應不得。

千峯榭宴坐

蒼寒千疊擁官居。吏退憑高樂有餘。盡日煙雲窮變化。入秋草木漸凋疎。朱絃靜按新傳譜。黃卷閑披累譯書。聊與邦人共無事。吾僚不用笑迂疎。

喜雨

勢掠郊原飛急雪。聲搖窗戶過奔雷。坐知多稼連雲熟。不獨新涼傍枕來。

又

浙瀝簷聲枕上聞。攬衣起坐對爐熏。萬家歌舞豐年樂。未費烏龍一線雲。

五鼓

樓堞琴琴鼓。簾櫳煜煜燈。浪名隨牒吏。實似打包僧。衰病元難強。疎慵每自憎。誰知戍邊日。秋野正呼鷹。

官居戲詠

萬里飄然似斷蓬。桐廬江上又秋風。判餘牘尾棲鴉溼。衙退庭中立雁空。燈火市樓知酒賤。歌呼村路覺年豐。誰言病守無歡意。也與他人一笑同。

又

說著功名卽自羞。暮年世味轉悠悠。一庭落葉楸梧老。萬里悲風鼓角秋。懷綬不爲明日計。登樓且散異鄉愁。漁舟大似非凡子。能揀溪山勝處留。是日書所見。

又

城頭閑倚一枝藤。病起清羸不自勝。衙鼓有期催晚坐。條鈴無賴喚晨興。愛書習氣嗟猶在。寡過工夫愧未能。寂寞已無臺省夢。諸公袞袞自飛騰。

倦眼

看書澀似上羊腸。得睡甘如飲蜜房。起坐藤床搔短髮。數聲畫角報斜陽。

拜旦表

一封馳奏效嵩呼。清暉何時返故都。只道建炎巡狩禮。誰知故事自祥符。

早自烏龍廟歸

殘漏聲中聽曳鈴。翩翩吹帽出郊垌。雨餘澗落雙虹白。雲合山餘一髮青。鐵馬蹴冰悲昨夢。朱顏辭鏡感頽齡。歸來獨對空齋冷。鳥迹蒼苔自滿庭。

上丁

燎火明中庭。老槐泣殘雨。白頭奉祀事。恐懼劇仰俯。三終樂在懸。再拜肉升俎。誰言千載後。恍若到鄒魯。吾國雖褊小。大社胙弗土。如何儼章綬。日夜臨筮楚。藏書如丘山。及物無一羽。吾其可憐哉。去去老農圃。

新秋

打窗落葉報秋期。病叟頽然兩鬢絲。縱酒已無年少夢。讀書仍負夜涼時。問囚損氣嗟誰念。學道刳心恐已遲。買鶴清溪歸計足。寄聲先遣故人知。

殘年

殘年迫鍾漏。病骨怯風霜。投幘早當去。強顏徒自傷。文符紛似雨。訟訴進如牆。笑殺滄浪客。微官有許忙。

休日行郡圃

南山如黛照朱扉。地接官居到亦稀。寒蝶徘徊掠衰草。孤花閃淡弄斜暉。荒城歌舞難娛客。休日文書且解圍。猶勝去年窮巷底。臥聞砧杵念秋衣。

登北榭

遶城山作翠濤傾。底事文書日有程。無瀾我爲揮吏散。獨登樓去看雲生。香浮鼻觀煎茶熟。喜動眉間煉句成。莫笑衰翁淡生活。它年猶得配玄英。方千有千峯樹詩。

小酌

簾外桐疎見露蟬。一壺聊醉嫩寒天。團臍磊落吳江蟹。縮項輪囷漢水鱸。此兩物近頗登盤。投老宦遊真漫爾。平生懷抱固超然。文書縛急何由耐。會向長安市上眠。

焚香作墨瀋決訟吏皆退立一丈外戲作此詩

客鬢新添幾縷絲。山城且付一官癡。空濛碧靄籠香岫。近得一石穴達於背。出香如雲。灑露玄雲起墨池。判牒不妨閑作草。坐衙聊得細哦詩。吏民莫怪秋來健。漸近南山射虎時。

齋中閑詠

風號萬物作濤聲。雲截千峯似几平。多病支離仍老境。暮秋蕭瑟更山城。燕觴久罷塵痕積。庭訟全稀藓暈生。莫道齋中日無事。焚香埽地又詩成。

秋夜聞雨

香斷燈昏小幌深。不堪病裏值秋霖。驚回萬里關河夢。滴碎孤臣犬馬心。清似釣船聞急瀨。悲於靜院聽繁砧。玉峯老去情懷惡。穩受千莖雪鬢侵。韓致光詩云。不知短髮能多少。一滴秋霖白一莖。

自詠

鈍似窗間十月蠅。淡如世外一孤僧。心勞撫字雖亡補。筆判虛空却竈能。厭見文書衙客袖。但思蔬水曲吾肱。何時却宿雲門寺。靜聽霜鐘對佛燈。

秋懷



少時本願守墳墓。讀書射獵畢。此生斷蓬遇風不自覺。偶入戎幙從西征。朝看十萬閱武罷。暮馳三百巡邊行。馬蹏度隴電聲急。士甲照日波光明。興懷徒寄廣武歎。薄福不挂雲臺名。頰鬚白盡愈落莫。始讀法律親筭榜。訟氓滿庭鬧如市。吏牘圍坐高于城。未嫌樵唱作野哭。最怕甜酒傾稀餚。平生養氣頗自許。雖老尙可吞司并。何時擁馬橫戈去。聊爲君王護北平。

不寐

閏年九月已重裘。說著功名卽自羞。病骨不禁霜氣峭。高風正送雁聲遒。半盃濁酒如欺老。一點青燈欲訴愁。不寐裁詩真習氣。輸它睡足向黃州。

醉中戲作

當年買酒醉新豐。豪士相期意氣中。插羽軍書立談辦。如山鐵騎一麾空。玉關久付清宵夢。笠澤今成白髮翁。堪笑燈前如意舞。尙將老健壓諸公。

頻夜夢至南鄭小益之間慨然感懷

身似菴居老病僧。罷參不復繫行縈。夢中忽在三泉驛。庭樹鳴梟鬼弄燈。

又

客枕夢遊何處所。梁州西北上危臺。雪雲不隔平安火。一點遙從駱谷來。

夜雨枕上

秋雨不肯晴。秋夜不肯明。寸心集百憂。厭此點滴聲。歲月不貸人。老病忽至此。丈夫本憂世。兒女乃畏死。

雨夜

蒼雲盡埋山。白雨夜溢渠。虛堂閃風燈。獨處誰與娛。吾生過六十。鬢髮日夜疎。出當飲美酒。歸常讀奇書。可憐兩不遂。兀兀如枯株。明復對胥吏。孤憤何由摅。

安流亭俟客不至獨坐成詠

憶昔西征鬢未霜。拾遺陳迹吊微茫。蜀江春水千帆落。禹廟空山百草香。馬影斜陽經劍閣。鷺聲清曉下瞿唐。酒徒雲散無消息。水榭憑欄淚數行。

秋興

楸槐雨盡。鶯雁水拍拍。曉行城南路。落葉滿阡陌。新霜上衰鬢。吾死亦已迫。那將有限身。常作未歸客。長吟側紗帽。萬里一秋色。世俗不足論。天豈無皁白。

又

朝先鳴雞興。夕殿棲鷗還。符檄積几案。寢飯於其間。榜笞督租賦。涉筆駢我顏。忽忽過白日。胡能慰惓慙。葉脫橫林疎。鬢髻溪南山。豈無一盃酒。吾事何時閑。

燕堂獨坐意象殊憤憤起登子城作此詩

睡魔困衰翁。白日坐兀兀。忽然振衣起。目瞭尙如鶻。憑高望中原。佳氣未消歇。逆賊稽大刑。痛憤深至骨。新霜下昌陵。草有胡馬齧。羽林百萬士。何日聞北伐。賤臣官有守。不敢叫行闕。夢中涉黃河。太行高礧砢。天河未洗兵。封豕食上國。坐令河洛間。百郡暗荆棘。夷吾非王佐。尙足救左衽。中原消息斷。吾輩何安寢。

世俗苦齷齪。誰與共此功。安知無奇士。悲歌燕市中。

秋雨北榭作

秋風吹雨到江濱。小閣疎簾曉色分。津吏報增三尺水。山僧歸入萬重雲。飄零露井無桐葉。斷續煙汀有雁羣。了却文書早尋睡。檐聲偏愛枕間聞。

次韻王給事見寄

大手方司一世文。癯儒何敢望餘塵。誰知天上黃扉貴。肯記江邊白髮新。末路愈窮詩有祟。舊書渾忘筆無神。床頭周易尊中酒。猶賴渠儂不負人。

病中夜半

蕭蕭欲脫猶吟葉。耿耿微明未滅燈。夜半不眠閑倚壁。使君清似北山僧。

卽事

組繡紛紛街女工。詩家於此欲途窮。語君白日飛昇法。正在焚香聽雨中。

歲晚懷故人

衰髯白盡無添處。病骨癯然欲折時。客抱琴來聊淪茗。吏封印去又哦詩。山橫城上勢如壓。角動樓頭聲正悲。零落斷鴻書不到。歲殘何以慰相思。

焉耆行

焉耆山頭暮煙紫。牛羊聲斷行人止。平沙風急捲寒蓬。天似穹廬月如水。大胡太息小胡悲。投鞍欲眠且

復起漢家詔用李輕車。萬丈戰雲來壓壘。

又

焉耆山下春雪晴。莽莽惟有蒺藜生。射麋食肉飲其血。五穀自古惟聞名。樵蘇切莫近亭障。將軍臥護真長城。十年牛馬向南睡。知是中原今太平。

丙午初冬得心腹痛疾大下而愈羸耗不支方在告臥燕堂東偏聞民間前一夕被盜者慨然有感

悒悒四壁空。宛宛一室奧。雨聲靜更聞。雨氣深不到。下簾設紙屏。篝火支藥竈。勿言此幽陋。足以養衰耗。頗聞閭里間。比夕多狗盜。游徼無乃闕。繆寡將執告。家貧未決去。祿食當念報。臥疴疇敢安。起立擲吾帽。因王給事回使奉寄

雨昏郡郭連三日。吏報江流忽數回。江每漲。津吏輒報。日或二四至。正歎船如天上坐。那知人自日邊來。臂弓腰箭身今老。航海梯山運已開。漢虜不應常自守。期公決策畫雲臺。

病告中遇風雪作長歌排悶

風雪橫街不能出。閉戶垂帷養衰疾。黃昏臥聽打窗聲。聊挽清寒入詩律。公孫布被久有味。子敬青氈煖無匹。石鼎閑烹似爪茶。霜皴旋破如拳栗。蹲鴟足火微點鹽。鬻粟熬湯旋添蜜。龍蛇鱗鱗寒笏束。子母累累丹柿實。玉狸試說涎已墮。石芥纔嘗酒如失。天公付汝亦已厚。飽食長謠抱雙膝。丈夫豈爲口腹計。壯志常恐無時畢。伐胡疏奏端許前。腰領敢辭膏斧鑕。

冬夜戲作

賤貧百年愁。老大萬事倦。起家來牧民。竊語笑丞椽。拘攣拙徵科。儉陋省遊宴。不思返江湖。乃爾辱畿甸。斯言中吾病。有覩在其面。行當自劾去。暫寓等郵傳。十月夜正長。歲事到冰霰。膏油幸可具。更盡書一卷。夜坐

曲几蒲團夜過分。頽然半脫鹿皮巾。驚鴻避弋鳴煙渚。斷角凌風上雪雲。仕宦愈知林下貴。窮愁方策酒中勳。扁舟東去何時辦。昔向金丹幸有聞。

又

山城意象自蕭然。況是高齋作雪天。漸暗玉蟲寒有燼。欲殘金鴨煖無煙。衰容病後如添歲。遙夜冬來抵過年。安得龍綃三丈幅。爲君試寫白雲篇。

遣興

圖書雞犬共扁舟。又續人間汗漫遊。醉眼本輕千古事。釣竿新賜一灘秋。慣看浮世成陵谷。莫露神光上斗牛。老病豈堪常作客。夢尋歸路傍西疇。

登紫翠樓

水落溪聲壯。天寒山色奇。殘雲宿虛閣。馴鷺下清池。簿領消豪氣。功名負聖時。憑高不勝歎。神武迫歸期。丙午十月十三夜夢過一大家傍人爲余言此荆軻墓也。按地志荆軻墓蓋在關中。感歎賦詩。采藥遊名山。物外富眞賞。秋關策蹇驢。雪峽蕩孤槳。還鄉忽十載。高興寄遐想。夢行河潼間。初日照仙掌。

坡陀荆棘冢。狐兔伏榛莽。悲歌易水寒。千古見精爽。國讐久不復。驚覺泚吾頤。何時真過茲。薄醅神所饗。

病起小飲

病起新霜滿鬢蓬。憑高一笑與誰同。酒如淥靜春江水。人有鴻荒太古風。野寺鐘來夕陽外。寒山空插亂雲中。一官正爾妨人樂。只合滄浪狎釣翁。

冬夜讀書

莫笑燈檠二尺餘。老來舊學要耘鉏。寒生點滴三更雨。喜動縱橫萬卷書。本著儒冠那免此。可因吏牘頓拋渠。善和舊賜今猶在。剩采芸香辟蠹魚。

夜坐觀小兒作擬毛詩欣然有賦

北風城頭鼓統統。徂歲崢嶸正多感。老夫假寐角巾低。穉子高吟兩髦髻。衰遲笑我藏袖手。狂率憐渠滿軀膽。旋炊粉餽裹青箬。新爨錫枝綴紅糝。未言問事漸瀾翻。且賞揮毫能果敢。嗟予疇昔如汝年。萬卷縱橫恣窺覽。卽今見汝尙懽欣。此癖真同嗜昌歎。夜闌我困兒亦歸。獨與狸奴分坐毯。

郡齋偶書

白首奉魚書。蕭然一事無。吏閑晨已散。人醉莫相扶。卷野收禾黍。連江下舳舻。山城君勿謂。東北是皇都。

又

翠嶺當城起。清江壁硤流。軻峨商客艫。嘈噴酒家樓。豐歲人元樂。殘年我獨愁。秦吳環萬里。感慨故貂裘。

又

江墮清笳月，霜嚴畫戟門。灘聲寒更壯，山氣旦常昏。搖落悲徂歲，羈遊憶故園。無勞空竊食，何以報君恩。  
燈下閱吏牘有感

老眼今年太負渠，義經魯史頓成疎。一爲柱後惠文吏，厭讀司空城旦書。正苦雁行須束縛，不言鼠輩合誅鉏。致君堯舜元無術，黃卷何辭飽蠹魚。

過放生池追懷江公民表諫議池蓋公所創也

釣臺先生諫大夫，建中初元起江湖。是非非玉座側，身可死，徒志不渝。煙汀月島二十載，白髮短舸藏菰蒲。晚蒙湔洗得一障，上奏猶自稱籠疎。公廣濟到任表云：不能軟熟，終是震疎，其不撓如此。此公造處直奇特。竺乾先生分半席，九州看如掌中果。天不遺爲吁可惜，徑歸斂手築陂池。也活龜魚論萬億，骨冷桐山喚不聞。停車悵望春波碧。

園中絕句

梅花重壓帽簷偏，曳杖行歌意欲仙。後五百年君記取，斷無人似放翁顛。

又

溪北溪南飛白鷗，夕陽明處見漁舟。憑誰爲剪機中素，畫取天涯一片秋。

戲作浙西諸郡惟嚴無職租

歸臥元知作餓夫，宦遊依舊是癯儒。免教妻子爭秔稊，秋稼連雲一稜無。

縱筆

閑經月下白蘋洲。半脫風前紫綺裘。曾值東風謁鸞駕。却因南渡看龍舟。年光已付瞿騰醉。天宇誰從汗漫遊。莫怪又成橫笛去。故人期我玉華樓。玉華樓在青城山丈人觀。

又

東都宮闕鬱嵯峨。忍聽胡兒敕勒歌。雲隔江淮翔翠鳳。露霑荆棘沒銅駝。丹心自笑依然在。白髮將如老去何。安得鐵衣三萬騎。爲君王取舊山河。

又

行省當年駐隴頭。腐儒隨牒亦西遊。千艘衝雪魚關曉。萬竈連雲駱谷秋。天道難知胡更熾。神州未復士堪羞。會須瀝血書封事。請報天家九世讎。

病中偶得名酒小醉作此篇是夕極寒

一壺花露拆黃滕。醉夢酣酣喚不膺。屏煖半銷香鴨火。窗寒初結研蟾冰。詩囊羞澀悲才盡。藥裹縱橫覺病增。早掛朝衣歸去是。貴人誰記接茵憑。

晨讀道書

家貧悔嗜酒。年邁思學道。雖云善補過。見事恨不早。儒生守章句。忽忽遂將老。巖間得奇書。足以慰華皓。丹液下注臍。黃雲上通腦。海山行當歸。白髮何足埽。

後園獨步有懷張季長正字

斯世元知少賞音。道存何恨死山林。半生去國風埃面。一片憂時鐵石心。閑看斷雲成小立。偶穿修竹得



幽尋故人已到梁州未。尺紙東來抵萬金。

老將效唐人體

寶劍夜長鳴。金痍老未平。指弓誇野戰。抵掌說番情。已矣黑山戍。悵然青史名。和親不用武。教子作儒生。

書憤

清汴逶迤貫舊京。宮牆春草幾番生。剖心莫寫孤臣憤。抉眼終看此虜平。天地固將容小醜。犬羊自慣瀆齊盟。蓬窗老抱橫行略。未敢隨人說弭兵。

晨起

衣潤熏籠煖。燈殘漏箭長。鳴雞帶窗月。立馬怯庭霜。病骨陰晴覺。官身早夜忙。火城那復夢。愁絕軟塵香。

雪

但苦奇寒惱病翁。豈知上瑞報年豐。一庭不埽待新月。萬壑盡平號斷鴻。繭紙欲書先研凍。羽觴纔舉已尊空。若耶溪上梅千樹。欠我今年繫短蓬。

歲晚書懷

早見龍翔上太清。紹興未。游官玉牒所。卽今孤宦老山城。靈丹不解換凡骨。薄命枉教生太平。積雪樓臺增壯觀。近春鳥雀有和聲。如山吏牘何時了。惆悵西窗晚照明。

晨過天慶

蘿月挂團壁。松風號急灘。孤燈經院曉。殘雪醮壇寒。賸欲閑扶杖。何妨醉墮冠。詩成興不盡。萬里跨青鸞。

冬夜

翻翻殘曆不滿紙。坎坎疊鼓無停撾。香殘未消古鼎火。燈暗尙結寒缸花。長安故人日已遠。錦江小築天之涯。拘攣動覺吏有責。幽獨更似僧無家。臥聞沙雁叫空闊。想見雪谷森谿沓。起提一筆掃疋紙。入卷颯颯奔龍蛇。

比得朋舊書多索近詩戲作長句

庭下訟訴如堵牆。案上文書海茫茫。酒酸肉冷不得嘗。椎牀大叫欲發狂。故人書來索文章。豈知吏責終歲忙。寒龜但欲事縮藏。病驥敢望重騰驤。日曛稍退鳧鷖行。小山叢竹堂東廂。呼兒深炷銅爐香。楚騷爲我被不祥。

休日感興

宦海風波實飽經。久將人世寄郵亭。家無釵澤窮馮衍。身著襦裙老管寧。藥圃按行新蔓綠。書樓徙倚暮山青。偶然得句悲誰屬。零落交朋比曉星。

病中偶書

燈火青燐古屋深。挂冠境界已駸駸。竹枝影瘦橫殘月。藥杵聲寒續暮砧。病覺死生真大事。老知道德愧初心。經龕禪版殊常勉。嬾學莎蛩事苦吟。

寒夜

脫葉爭辭木。寒雲巧護霜。羈遊少驩樂。短景極匆忙。吟苦蟲催織。鳴哀雁斷行。幽懷誰晤語。惆悵此燈光。

雪中獨酌

金尊玉盞有何好。不堪生世匆匆老。朱顏忽已謝晨鏡。白骨行看閉秋草。駭浪嵯峨風作之。蛟龍血入以爲嬉。畏塗寄命三十載。賴有痛飲紓吾悲。莫驚醉眼炯如電。假鉞猶堪行督戰。指麾突騎取遼陽。雪灑轅門夜傳箭。

送客

長亭柳漸柔。送客常閑遊。江近聞津鼓。雲開見戍樓。簿書來袞袞。歲月去悠悠。閉眼尋歸路。春蕪滿故疇。

新晴

宿雨解殘雪。新春侵故年。和風拆冰罅。淡日弄窗妍。心事綠尊裏。歲華烏帽邊。今朝我病減。隨處一欣然。

出城

翩翻烏帽出林垌。掠面風微酒半醒。戍火難尋玉關夢。衣塵空愧草堂靈。天晴山雪明城郭。水漲江流近驛亭。客鬢不如堤上柳。數枝春動又青青。

立春日送客郊外

短髮那禁歲月催。勝邊花底又春回。雪消漸暖青鴛日。冰解初橫玉鑑梅。江驛軒窗臨古道。市樓絃管賣新醅。自憐病守無歡意。一笑常因送客來。

大雪自夜至旦欲午始晴

薄暮雪雲低。清宵氣慘悽。方聽打窗急。已報與階齊。疎箔穿飛蝶。空庭聚戲猊。新晴思訪客。愁絕滿城泥。

雪夜有感

狂膽輪囷欲滿軀。一麾誰憫滯江湖。青衫曾奏三千牘。白首猶思丈二笏。龍虎翔空瞻王氣。犬羊度漠避天誅。何時冒雪趨行殿。香案前頭進陣圖。

雪中忽起從戎之興戲作

狐裘臥載錦駝車。酒醒冰髭結亂珠。三尺馬鞭裝白玉。雪中畫字草軍書。

又

鐵馬渡河風破肉。雲梯攻壘雪平壕。獸奔鳥散何勞逐。直斬單于覈寶刀。

又

十萬貔貅出羽林。橫空殺氣結層陰。桑乾沙土初飛雪。未到幽州一丈深。

又

羣胡束手仗天亡。棄甲縱橫滿戰場。雪上急追奔馬迹。官軍夜半入遼陽。

十二月二十七日祭風師歸道中作

虎豹生憎上九關。諸公袞袞遂難攀。面顏已老塵埃裏。精力虛捐簿領間。束帶敢言趨玉陛。橫戈猶憶戍天山。新春自笑摧頽甚。鼓吹東風拜胙還。

春晴

南陌爭牛事已非。綵山又近放燈期。風和已染柳千縷。山冷未開茶一旗。酒病況當人別後。春光偏在雪

晴時道傍笑我清狂在。馬上看山細詠詩。

丁未正月春色已粲然露坐高風堂北觀種花

苦寒不解歲嶢嶢。病守兀坐憂疲氓。天風誰遣撼斗柄。便覺春色來江城。北山賽廟見殘雪。東津送客聞新鶯。衣裘漸減體殊健。簾幙乍捲眼爲明。今朝天氣更佳絕。淡日微漏雲徐行。我移胡床坐庭下。幅巾半脫筇枝橫。散關旌旗掃昨夢。少城絲竹真前生。數株桃杏亦漫種。未去與汝聊逢迎。

燕堂春夜

南樓統統下疎更。一點紗籠滿院明。映月疎梅入簾影。讀書穉子隔窗聲。呻吟藥裏身寧久。汛掃胡塵意未平。草檄北征今二紀。山城仍是老書生。游嘗爲丞相陳魯公。史魏公。樞相張魏公。草中原及西夏書檄於都堂。

早春池上作

疎嬾元當與世辭。殘年況近乞身期。一官空作讀書祟。五斗不供沽酒資。冰拆野塘初澌澌。雪殘芳草已離離。物華似有平生舊。不待招呼盡入詩。

感興

文章天所祕。賦子均功名。吾嘗考在昔。頗見造物情。離堆太史公。青蓮老先生。悲鳴伏櫪驥。蹭蹬失水鯨。飽以五車讀。勞以萬里行。險艱外備嘗。憤鬱中不平。山川與風俗。雜錯而交并。邦家志忠孝。人鬼參幽明。感慨發奇節。涵養出正聲。故其所述作。浩浩河流傾。豈惟配詩書。自足齊談誼。我衰敢議此。長歌涕縱橫。

東齋偶書

華髮蕭蕭不滿簪，強扶衰病著朝衫。寒廳靜似阿蘭若，佳客少於優鉢曇。詩酒放懷窮亦樂，文移肆罵老難堪。棄官若遂飄然計，不死揚州死劍南。顧況詩云：人生只合揚州死，而余嘗有歸蜀之意。

丁未上元月色達曉如晝予齋居屬貳車領客

此夕幾年無此晴，碧天萬里月徐行。官壚賣酒傾千斛，市里行歌徹五更。潼酪獨烹僧鉢美，瑤璃閑照佛龕明。頽然坐睡君無笑，寶馬香車事隔生。

自郊外歸北望譙樓

天上何年墮翠蚪，屈蟠爪尾護吾州。重門雨細旌旗溼，危堞風高鼓角遒。漠漠川雲昏佛塔，涓涓野水入農疇。曠懷不耐微官縛，擬脫朝衫換釣舟。

馬上作

平橋小陌雨初收，淡日穿雲翠靄浮。楊柳不遮春色斷，一枝紅杏出牆頭。

還舍

賸欲銜盃樂太平，新愁還續舊愁生。出門始覺春來早，處處簾櫳笑語聲。

杏花

江城開歲風百頻，閉閣不出俄經旬。忽逢國豔帶卯酒，坐覺天地無餘春。芳敷正當晨露重，盛麗欲擅年華新。數株欹斜傍山驛，一簇深淺臨煙津。徘徊跋馬不忍去，只恐飄墮隨車塵。念當載酒醉花下，破曉啼

鶯先喚人。

兩京

兩京煙柳厭胡塵。又見淳熙十四春。薄命遭回猶許國。孤忠懇款欲忘身。蘇君落魄黃金盡。褚令悲傷白髮新。曾向延和隨仗入。至今殿檻夢嶙峋。

贈表弟江參議

襄州參議真豪傑。熟視華途嬾著鞭。奪得鸞篋花裏活。皎如玉樹酒中仙。才高狗監無人薦。句好雞林有客傳。江弟今居四明。老去眼邊親舊少。津亭少爲繫歸船。

讀書

束髮論交一世豪。暮年顛顛困蓬蒿。文辭博士書驢券。職事參軍判馬曹。病裏猶須看周易。醉中亦復讀離騷。若爲可奈功名念。試覓并州快剪刀。

夜登千峯榭

夷甫諸人骨作塵。至今黃屋尙東巡。度兵大峴非無策。收泣新亭要有人。薄釀不澆胸壘塊。壯圖空負膽輪囷。危樓插斗山銜月。徙倚長歌一愴神。

旬日公事頗簡喜而有賦

社近樓臺晝已長。豐年頗減簿書忙。雨催樹綠吹簫陌。日射塵紅擊鞠場。農事漸興初浸種。吏衙早退獨焚香。晚來別有歡然處。檢教兒書又一箱。杜牧之寄小姪阿宜詩云。一日讀十紙。一月讀一箱。

聞鼓角感懷

鼓坎坎。角鳴鳴。四鼓欲盡五鼓初。老眼不寐如鰈魚。撫枕起坐涕泗滯。平生空讀萬卷書。白首不識承明廡。時多通材臣腐儒。妄懷孤忠策則疎。欲剖丹心奏公車。論罪萬死尙有餘。雷霆願復寬須臾。許臣指陳輿地圖。億萬遺民望來蘇。藝祖有命行天誅。皇明如日詎敢誣。拜手乞賜丈二笏。中原煙塵一掃除。龍舟泝汴還東都。

社日小飲

催花初過社。公雨對酒喜烹溪。友魚儘道亂山窮絕處。年華未覺異吾廬。

又

社雨霏霏溼杏花。農家分喜到州家。蒼鵝戲處塘初滿。黃犢歸時日欲斜。

昔日

昔日從戎日。身由許國輕。陣如新月偃。箭作餓鷗鳴。堅壁臨關守。連營並渭耕。至今悲義士。書帛報番情。予在興元日。長安將吏以申狀至。宣撫司皆蠟彈。方四五寸。絹處中動息必具報。

新晴

雨斷歸雲急。沙乾步履輕。風花嬌作態。野水細無聲。社酒家家醉。春蕪處處耕。今朝公事少。一笑賦新晴。

倚欄

閑岸紗巾小倚欄。吳中三月尙春寒。蜂脾蜜滿花初過。燕觜泥新雨未乾。老厭簿書思屏迹。病逢節物強



追歡一樽又動流年感。城上斜陽畫角殘。

寄徑山印禪師

市朝聲利戰方酣。眼看紛紛每不堪。但有客誇車九九。了無人問衆三三。會當身返東西蜀。要與公分上下菴。趙州有上菴菴主。下菴菴主語。春枕悠然夢何許。兩枝筇杖喚魚潭。喚魚潭在眉山中。巖客至撫掌。魚輒羣出。

園中歸戲作

醉裏來尋澗上花。已飄殘雪散餘霞。麴生也解欺人老。風伯無端妬物華。不恨童心伴蜂蝶。但愁病眼厭風沙。歸來隱几東窗下。一卷黃庭送日斜。

春曉東郊送客

雨餘氣清潤。迨我送客時。翻翻車蓋風。五里城東陂。初旭斂花房。晨露流桐枝。南山卷溼翠。更覺光景奇。澄潭集魚艇。村路亞酒旗。欲歸且復留。造物成吾詩。

暮春歎

春深桃李爭時節。千團紅雲萬堆雪。東風一夜吹欲空。曲徑平池爛如纈。城門獵獵雙青旗。羲和促轡西向馳。中原未有澄清日。志士虛捐少壯時。

曉雨

平明小雨壓香塵。透舍扶疎綠漸勻。睡過花時慵著句。老來春事不關身。

又

東風吹雨送殘春。冉冉年光次第新。君看枝頭如許綠。爭教桃李不成塵。

登千峯榭

飛觀危欄縹緲中。聊將醉眼送歸鴻。一生未售屠龍技。萬里猶思汗馬功。王衍諸人寧足責。姜維豎子自應窮。他年弔古憑高處。想見清伊照碧嵩。

晚春園中作

少逢春歸未解悲。千篇曾賦傷春詩。可堪霜點鬢鬚後。更值綠暗園林時。楊花輕墮簷外影。杏子重壓闌邊枝。毬場立馬漏聲靜。綺窗語燕簷陰移。向來春事渺何許。長空鳥跡何由追。鞦韆未拆已寥寞。日暮東風吹綵旗。

北窗

小雨霏霏旋作晴。北窗清潤綠陰成。却緣政拙文書少。臥聽簾櫳燕子聲。

浮生

浮生過六十。百念已頽然。獨有耽書癖。猶同總角年。橫陳糲飯側。朗誦短檠前。不用嘲癡絕。兒曹尚可傳。

小壘

小壘荒寒外。高齋寂寞中。貧妨挂冠快。病減讀書功。橋斷春江白。雲穿夕照紅。悠然扶杖處。歲月歎恩恩。

大閱後一日作假

小院鈎簾掃落花。公餘蕭散似山家。下巖紫壁臨章草。正焙蒼龍試貢茶。塞上遠遊心尚壯。車中深閉髮先華。老來日月真堪惜。愁聽高城咽暮笳。

自嘲

貪祿忘歸祇自羞。一窗且復送悠悠。鏡明不爲人藏老。酒薄難供客散愁。正得虛名眞畫餅。元非大器愧函牛。年來事業知君否。高束詩書學問囚。

曉出東城

聽徹清笳聽曉鐘。據鞍漏鼓尙鏦鏦。西樓落日徑三尺。北嶺亂雲生半峯。蒼磴幽尋過古寺。綠疇小駐勞春農。煙村已遠猶回首。恐有鷓鴣與伏龍。

初夏遇休日園中閑賦

青山圍女牆。細草滿毬場。虛簷搖水影。曲檻吹蘋香。房櫳寂無人。雙燕說曉涼。賜休無公事。蕭散寄一床。久苦吏役拘。更知閑味長。桑空繭綴簇。陂滿稻吐秧。良時動人懷。東望一慨慷。寧當戀微祿。如鼠死太倉。

小雨出西門五里至東嶽廟

埋沒文書每自憐。偷閑出郭一欣然。稻陂雨細豐年候。槐陌風清嫩暑天。心似春鴻寧久住。身如秋扇合長捐。平生士雅今亡恙。老病何由共著鞭。

初夏燕堂睡起

歌鳳平生類楚狂。山城遲暮得深藏。洗春雨過清陰合。掠水風生綠藻涼。晨几硯凹涵墨色。午窗盃面聚

茶香功名到手渾閑事。此興他年未易忘。

晡後領客僅見燭而罷戲作短歌

忍睡出坐衙扶病起觴客本來世味薄。況復酒戶迮。譚諄時強語。崑昂已頽幘。燒燭不盈寸。歸臥弄書冊。我來未穫稻。客裏今食麥。悵望稽山雲。飛去無六翮。

讀宛陵先生詩

歐尹追還六籍醇。先生詩律擅雄渾。導河積石源流正。維嶽崧高氣象尊。玉磬漻漻非俗好。霜松鬱鬱有春溫。向來不導無譏評。敢保諸人未及門。

書歎

人生如春蠶。作繭自纏裹。一朝眉羽成。鑽破亦在我。少年不自珍。妄念然烈火。眼亂舞腰輕。心醉笑齒瑳。餘齡幸早悟。世味無一可。但憶喚山僧。煎茶陳餅果。

卷第十九

曉出南山

久向人間觸駭機。斂收孤迹早宜歸。亡羊未恨補牢晚。搏虎深知攘臂非。明月長庚天欲曉。新桐清露暑猶微。扁舟蓑笠平生事。莫羨黃金帶十圍。

聞韓无咎下世

書劍飄然去國時。南蘭陵郡日題詩。吳波漲綠迎桃葉。穠燭堆紅按柘枝。故友去爲山下土。衰翁何恨鬢邊絲。憑高老淚無揮處。神武衣冠挂已遲。

### 官居書事

早涉人間足畏塗。一麾投老向江湖。年光已上星星鬢。日力猶供急急符。本自陽狂無藉在。更堪羸病不枝梧。滅胡意氣嗟誰許。淚盡神州赤縣圖。

又

走遍人間老更窮。強尋一笑與誰同。簿書袞袞呻吟裏。歌舞紛紛困睡中。手版倒持悲末路。寒江獨釣媿高風。知心賴有譚夫子。時遣書來問放翁。比數得譚德稱書。

### 夏日北榭賦詩弈棋欣然有作

異事嚴州省見稀。幅巾闌角立多時。青林白鳥自成畫。急雨好風當有詩。酷信醫方逢酒怯。強驅吏牘坐衙遲。悠然笑向山僧說。又得浮生一局碁。

### 謁告歸臥晚登子城

此身真是抱官囚。厭見長空赤日流。齋壁曉山千嶂雪。扇紈新雁一汀秋。繫船空作清湘夢。御氣難尋太華遊。菱角藕絲還恨少。強攜玉瀉醉高樓。

### 迂使客出郊夜歸過市樓

山川慘澹作秋霖。雲物徘徊結夕陰。手版向人慚老大。肩輿出郭當登臨。二年雪瀨饒羈思。萬里冰河歇

壯心却羨喧呼樓上客。隔簾紅燭醉更深。

秋夜登千峯榭待曉

萬里秋風夜艾時。剡川孤客不勝悲。讀書眼暗定誰許。憂國涕零空自知。欲墜高梧先策策。漸低北斗正離離。倚闌不覺雞號曉。剪燭題詩寄所思。

九月初郊行

九月吳中尚袂衣。江郊策馬踏斜暉。薔花漫漫連山路。豆莢離離映版扉。蒼兔避鷹投磔去。黃鶴脫網傍人飛。農家光景關心事。不爲無才也合歸。

衰病

衰病龍鍾已要扶。誰憐猶作折腰趨。世無魯國真男子。心憶高陽舊酒徒。萬里秋風吹鬢髮。百年世事歎頭顛。桐江久客無奇句。孤負君王乞左符。

書意

一鳴輒斥不鳴烹。禍福元知未易評。湖海淒涼身跌宕。盃觴豪舉筆縱橫。敢希二頃成高臥。但願諸公致太平。波暖龍舟泝清汴。道邊扶杖眼猶明。

秋懷

策策桐葉風。濛濛菊花雨。空堂一燈青。幽壁百蟲語。嗟余豈願仕。老病歸無所。屈指計歲年。強半墮羈旅。荷戈北戍秦。挂席西適楚。名慚垂竹帛。文不諧律呂。所餘惟一死。忍復類兒女。金丹或可成。青霄渺輕舉。

過村店有感

細篾絡丹柿。枯籬懸碧花。炊煙生旅竈。野水漱寒沙。棲鳥爭投樹。歸牛自識家。恍然遊蜀路。搔首憶天涯。

嚴州大閱

鐵騎森森帕首紅。角聲旗影夕陽中。雖慚江左繁雄郡。自樂天詩云。雪川何寂寞。茂苑太繁雄。且看人間  
矍鑠翁。清渭十年真昨夢。玉關萬里又秋風。憑鞍撩動功名意。未恨猿驚蕙帳空。

後園閑步

木葉勾萌喜小春。鬢毛蕭颯媿陳人。今朝忽破簿書夢。此地暫還風月身。閑岸綸巾照清淺。却扶藤杖上  
嶙峋。人生要是便疎豁。金馬銀臺莫問津。

照潺湲閣下池水

平生不鑷白。霜雪滿鬢眉。照水默自笑。已迫溝壑期。慨然念歸休。不計妻子飢。渠飢亦有命。我節詎可移。  
自我來桐江。實無負慆。孽。讒波如崩山。孤迹則已危。陸子定何人。正恐君未知。午枕夢剡曲。秋風吹釣絲。

秋郊有懷

漫漫蕎麥花。如雪覆平野。離離豆子莢。數枝忽堪把。頗憶故鄉時。屏迹謝車馬。水宿依蟹舍。泥行沒牛胯。  
作勞歸薄暮。濁酒傾老瓦。縷飛綠鮒膾。花簇頰鯉鮓。棄官雖未決。世念亦已且。浩歌續楚狂。幽懷欣獨寫。

又

檐頭買雙兔。市店取斗酒。還家掃北窗。歡言酌親友。家貧氣未餒。禮薄情更厚。高吟金石裂。健筆龍蛇走。

酒闌起出門。孤月挂衰柳。大笑各散歸。吾輩可不朽。官身縛簡書。此樂寧復有。悵望秦稽雲。憑高一搔首。

又

楚人固多孱。妄謂秋可悲。寧知河嶽間。氣俗樂此時。壯士鳴雕弓。健馬嚼枯萁。日馳三百里。榆關赴戰期。陣雲壓龍庭。殺氣搖參旗。熾火燎狐兔。倒瀉黃金卮。勒銘燕然石。千載鎮胡兒。安能空山裏。凍研哦清詩。

又

秋山瘦益奇。秋水淺可涉。出城西風勁。拂帽吹脫葉。新霜拆栗罅。宿雨飽豆莢。枯柳無鳴蜩。寒花有穿蝶。郊行得幽曠。頗覺耳目愜。斷雲北山來。欣然與之接。挂冠易事爾。看鏡歎勳業。永懷桑乾河。夜渡擁馬鬣。

夙興

喔喔老雞催落月。丁丁殘漏伴斜河。一盃淡□寒燈下。還與山僧不校多。

聽事望馬目山

官身早暮不容閑。塵土堆胸媿滿顏。也有向人誇說處。坐衙常對水南山。

秋興

滿簪白髮不勝繁。竊祿偷安媿主恩。東館煙波秋漸瘦。北山霧雨晝多昏。功名蹭蹬身長棄。籌策瀾翻舌幸存。堪笑此生虛過盡。一秋閉閣聽啼猿。

又

孤城寂寞近江干。處處疎碁送早寒。水落纔餘半篙綠。霜高初染一林丹。民租屢減追胥少。吏責全輕法



令寬偶有一樽聊獨醉。強掇黃菊助清歡。

久無暇近書卷慨然有作

少年喜讀書。事業期不朽。致君頗自許。書卷常在手。白頭乞鍾釜。坐使此心負。朝衙有達午。夕坐或過酉。文符苦酬對。迎餞厭奔走。直憂先狗馬。豈但凋蒲柳。永懷簡編香。更覺冠冕醜。飢餐一簞飯。悶酌一卮酒。吟哦從所好。貧賤亦何有。余悔已莫追。寄謝故山友。

嚴州多菊。然率過重陽方開。或舉東坡先生菊花開時。卽重陽之語。余謂此猶是未忘重陽者。恐此花不肯也。戲作一絕。

無人喚醒賦歸翁。滿把清香誰與同。但辦對花頻舉酒。莫橫重九在胸中。

地僻

地僻天教養散材。流年沉著鬢毛催。青山自繞孤城去。畫角常隨晚照來。几淨雙鉤摹古帖。甕香小啜試新醅。乘槎不是英纏遠。無奈先生興盡回。

吏責

吏責何時得暫停。年來減盡鬢邊青。高談正樂催迎客。美睡方酣報掣鈴。安得雲山長在眼。便從樵牧與忘形。詩成不用頻悵悵。自古籠禽例剪翎。

張時可直閣書報已得請奉祠。雲臺作長句賀之。

燈前一笑拆書開。喜見冰銜洗俗埃。丞相苦留猶不住。諸公欲挽固難回。玩鷗有約間何闊。斂版無聊歸

去來千載伏波應。太息輸君談笑上雲臺。

累日文符沓至悵然有感

豪氣人言苦不除。固應屏迹向江湖。封侯萬里獨心在。餬口四方何事無。薄俗更堪開眼看。老翁寧辦折腰趨。鼠肝蟲臂今無擇。付與乾坤造化爐。

又

白首逢人只累欷。今雖未是昨真非。文章才盡欲焚稿。仕宦興闌當拂衣。浪出自應爲後戒。放言那計墮危機。遼天華表蒼茫裏。千載何人識令威。

又

三十年爲一世人。孤城夢斷洛陽塵。游忝朝迹今二十有八年矣。強顏嬾復看人面。何地真堪著此身。白骨久埋金谷友。黃花尙醉葛天民。嚴光釣瀨雖亡恙。除却江山萬事新。

大風

初聞瀕洞怒濤翻。徐聽驂驪戰馬奔。紙帳蒲團坐清夜。恍如身在若耶村。

冬夜讀書

退食淡無事。一窗寬有餘。重尋總角夢。却對短檠書。功業雖蹉跎。光陰且破除。更須求半偈。回向此心初。

再用前韻不以次

壯心雖迫老。吏責未妨書。言議思公瑾。英雄陋本初。移燈近牀榻。聽雨落塔除。回首山南戍。流年一紀餘。

思歸

短髮今年雪滿巾。一盃且醉瓮中春。定無術致長生藥。那得愁供有限身。碎枕不求名利夢。挽河盡洗簿書塵。江湖意汝君知否。致主唐虞自有人。

喜小兒病愈

喜見吾家玉雪兒。今朝竹馬遶廊嬉。也知笠澤家風在。十歲能吟病起詩。緯忽作病起詩一首。

又

一牀共置朝回笏。百屋常堆用剩錢。何似吾家好兒子。吟哦相伴短檠前。

初冬風雨驟寒作短歌

東園日淡雲容薄。綸巾朝暮闌干角。北風動地萬木號。不料一寒如此惡。豈惟半夜雨打窗。便恐明朝雪平壑。綠酒雖漓亦復醉。阜貂已弊猶堪著。所嗟此身老益窮。蹭蹬無功上麟閣。久從漁艇寄江湖。坐看胡塵暗幽朔。萬鞭枯骨憤未平。蠶下老翁何足縛。要及今年墮指寒。夜擁雕戈度窮漠。

余年二十時嘗作菊枕詩頗傳於人今秋偶復采菊縫枕囊悽然有感

采得黃花作枕囊。曲屏深幌闕幽香。喚回四十二年夢。燈暗無人說斷腸。

又

少日曾題菊枕詩。蠹編殘稿鎖蛛絲。人間萬事消磨盡。只有清香似舊時。

陶淵明云三徑就荒松菊猶存蓋以菊配松也余讀而感之因賦此詩

菊花如端人。獨立凌冰霜。名紀先秦書。功標列仙方。紛紛零落中。見此數枝黃。高情守幽貞。大節凜介剛。乃知淵明意。不爲汎酒觴。折嗅三歎息。歲晚彌芬芳。

蕎麥初熟刈者滿野喜而有作

城南城北如鋪雪。原野家家種蕎麥。霜晴收斂少在家。餅餌今冬不憂窄。胡麻壓油油更香。油新餅美爭先嘗。獵歸熾火燎雉兔。相呼置酒喜欲狂。陌上行歌忘惡歲。小婦紅粧穗簪髻。詔書寬大與天通。逐熟淮南幾誤計。

有自蜀來者因感舊遊作短歌

錦城如海行不極。馬迹重重車轂擊。家住城西三十年。聞說城東未曾識。看花走馬宿中路。經月酒徒無覓處。露香風暖海棠開。碧雞坊中倘相遇。放翁顛領鬢成絲。空有西遊千首詩。今朝雨霽上危榭。意氣頗如年少時。持盃欲作消愁計。酒未著人愁已醉。不成題句寫幽情。一幅蛟綃空寄淚。

東吳女兒曲

東吳女兒語如鶯。十三不肯學吹笙。鏡奩初喜穉蠶出。窗眼已看雙繭成。庭空日暖花自舞。簾卷巢乾燕新乳。阿弟貪書下學遲。獨揀詩章教鸚鵡。

雨夕

歲旱連夏秋。客袂厭塵土。欣然成一笑。愛此清夜雨。瓦檠墮燈燼。銅碗起香縷。心清病良已。境寂句欲吐。東溪久枯涸。想像素蛟舞。分喜到溝池。遊魚命儔侶。

晚遊東園

藥瓢藜杖合施行。獨往山林已歃盟。傍水斷雲含暮色。拂簷高竹借秋聲。癡人自作浮生夢。腐骨那須後世名。莫笑吟哦無闕日。老來未盡獨詩情。

小雨

小雨暗林塘。寒聲遶畫廊。事須求暫假。宜睡稱燒香。事須二字。蓋唐人公移中語也。

初寒在告有感

掃地燒香興未闌。一年佳處是初寒。銀毫地綠茶膏嫩。玉斗絲紅墨瀋寬。俗事不教來眼境。閑愁那許上眉端。數椽留得西窗日。更取丹經展卷看。

又

豪舉當年氣吐虹。卽今顛顛一衰翁。寄懷本自俗塵外。移病何妨寒雨中。香暖候知銀葉透。酒清看似玉船空。故人吳蜀音塵斷。安得相攜一笑同。

又

橫林吹葉水生洲。身落窮山古陸州。到枕雨聲酣旅夢。背窗燈影動清愁。氣衝星斗有孤劍。力挽棟梁無萬牛。未減匈奴身已老。此生虛負幄中籌。

馬上作

白髮憑鞍一老翁。出門漏鼓尙鞞鞞。淒涼旅思傳呼裏。零落新詩假寐中。正苦文移來陸續。何由笠釣入

空濛浮生正自少如意付與秋風吹斷蓬。

冬夜聞角聲

嫋嫋清笳入雪雲。白頭老守臥中軍。自憐到死懷遺恨。不向居延塞外聞。

又

憶在梁州夜雪深。落梅聲裏玉關心。山城老去功名忤。臥對寒燈淚滿襟。

塞上曲

茫茫大碛吁可嗟。暮春積雪草未芽。明月如霜照白骨。惡風卷地吹黃沙。騶鳴喜見泉脈出。雁起低傍寒雲斜。窮荒萬里無斥堠。天地自古分夷華。青氍紅錦雙奚車。上有胡姬抱琵琶。犯邊殺汝不遺種。千年萬年朝漢家。

荊州歌

楚江鱗鱗綠如釀。御尾江邊繫朱舫。東征打鼓挂高帆。西上湯豬聯百丈。伏波古廟占好風。武昌白帝在眼中。倚樓女兒笑迎客。清歌未盡千觴空。沙頭巷陌三千家。煙雨冥冥開橘花。峽人住多楚人少。土鑄爭餉菜莢茶。

冬夜讀書

挑燈夜讀書。油涸意未已。亦知夜既分。未忍捨之起。人生各有好。吾癖正如此。所求衣食足。安穩住鄉里。茆屋三四間。充棟貯經史。四傍設几案。坐倦時徙倚。無聲九韶奏。有味八珍美。寢餽籤帙間。自適以須死。

豈惟畢吾身，尚可傳兒子。此心何時遂，感歎歲月駛。

寓歎

江上霜風透弊袍，區區無奈簿書勞。衰遲始憶壯遊樂，仕宦更知歸臥高。人怪羊裘忘富貴，我從牛僧得賢豪。俗間問訊真成嬾，有手惟堪把蟹螯。

又

劍外歸耕夢不通，公車上疏路何從。有心求縮地萬里，無羽可朝天九重。狂誦新詩驅瘧鬼，醉吹橫笛舞神龍。明當采藥玉霄去，他日君看冰雪容。

燕堂東偏一室頗深暖，盡日率困於吏牘。比夜乃得讀書，其間戲作。

袞袞流年往，匆匆短景過。簾深上燈早，地窄貯香多。書盡還重讀，詩成更自哦。向令無此處，將奈旅愁何。

又

賦性無他好，開編喜欲迷。萋萋傳夜漏，喔喔待晨雞。油減玉蟲暗，灰深紅獸低。悠然撫書歎，無術濟黔黎。

又

永夜東齋裏，人聲靜不譁。衣篝起香穗，書几落燈花。爐暖聽寒雨，窗明送曉鷗。文章空自苦，白首不名家。

懷鏡中故廬

臨水依山偶占家，數間茆屋半欹斜。雲邊腰斧入秦望，雨外舞蓑歸若耶。從宦只思乘下澤，忤人常悔讀南華。病來更怯還鄉夢，頻鬻簾泉試露芽。

書感

丈夫本願脫世鞿，丹成晝日凌空飛。纓冠佩玉朝紫微，白銀宮闕瞻巍巍。不然萬里將天威，提兵直解邊城圍。苜蓿滿川胡馬肥，掩取不遺一騎歸。苦心文章亦未非，與此二事同一機。寥寥千載見亦稀，莊屈已死吾疇依。哀哉窮子百家衣，豈識萬斛傾珠璣。欲洗薄蝕還光輝，熟說無力空歎欷。

對酒

新酥鵝兒黃，珍橘金彈香。天公憐寂寞，勞我以一觴。胸中萬卷書，老不施毫芒。持酒一澆之，與汝俱深藏。生當老窮巷，死埋南山岡。古來共如此，已矣庸何傷。

夢歸

老去無餘念，時時夢弊廬。細傾新釀酒，盡讀舊藏書。雲崦鉏畬粟，煙畦挽野蔬。從渠造物巧，賦芋戲羣狙。

蜀使歸寄青城上官道人

輕別青城十二年，至今客枕夢林泉。一盃松屑齋前進，兩卷丹經肘後傳。欲與公爲塵外侶，幾時身上峽中船。世間牛蟻何勞問，輸與雲窗一粲然。上官常稱病慣，對客一笑而已。

寄成都籊道人

賣藥錦城中，燒丹雪山麓。石竇取鵝管，玉床收箭鏃。紫雲晨覆鼎，白虹夜穿屋。鬼神嚴厲守，沆瀣勤沐浴。此士真可人，高簡遺世俗。江頭十年別，顏色炯在目。使來每寄聲，喜我淡無欲。靈劑何必多，分餉一黍足。

寄邛州宋道人宋與余在臨邛鴨翎舖同遇異人宋遂寔官學道



鴨翎舖前遇秋雨。獨與宋生棲逆旅。坐門儻悅見老仙。劇談氣欲凌天宇。袖中出劍秋水流。血點斑斑新報仇。我醉高歌宋生舞。洗盡人間千古愁。老仙約我遊太華。是夕當醉蓮峯下。語終冉冉已雲霄。萬里秋風吹鶴駕。我今伶俚踐衰境。不如宋生棄家猛。西望臨邛一慨然。青松偃盡丹爐冷。

小齋壁間張王子喬梅子真李八百許旌陽及近時得道諸仙像。每焚香對之。因賦長句。

山城作吏老堪羞。衫色塵昏鬢色秋。斂版那供新貴使。閉門聊與數公遊。至人不死閱千劫。大海無窮環九州。安得相攜從此逝。醉騎丹鳳下玄洲。

芳草曲

蜀山深處逢孤驛。缺甃頽垣芳艸碧。家在江南妻子病。離鄉半歲無消息。長安城門西去路。細靄斜陽芳草暮。尊前一曲渭城歌。馬蹄萬里交河戍。人生誤計覓封侯。芳草愁人春復秋。只願東行至滄海。路窮草斷始無愁。

烏龍廟

江邊蒼龍背負天。蟠踞千載常蜿蜒。其前橫關爲大州。高城鼓角聲隱然。龍廟於山家於淵。世爲吾州作豐年。老守雖愧筆如椽。潔齋試賦迎神篇。

寒夜移疾

南山北山高嶙峋。朝雨暮雨斷江津。時人正作市朝夢。老子已成雲水身。希世強顏心自媿。閉門謝病客生曠。天公何日與一飽。短艇湘湖自采蓴。湘湖在蕭山縣。產蓴絕美。

又

走遍天涯白髮生。晚叨微祿臥山城。知章自識狂供奉。士季那容醉步兵。斷藥有時攜短鏡。奏書無路請長纓。此心擬說還休去。付與空塔夜雨聲。

寒夜讀書

北窗暖焰滿爐紅。夜半濤翻古檜風。老死愛書心不厭。來生恐墮蠹魚中。

又

韋編屢絕鐵硯穿。口誦手鈔那計年。不是愛書卽欲死。任從人笑作書顛。

又

憶昨從戎出渭濱。秋風金鼓震咸秦。鳶肩竟欠封侯相。三尺檠邊老此身。

有爲子言烏龍高嶮不可到處。有僧巖居不知其年。予每登千峯榭。望之慨然爲作二詩。

樵子向予說。有僧巢翠微。巖扉雲共宿。錫杖鶴同飛。日暮松明火。天寒柵葉衣。棄官從此逝。非子尙誰歸。

又

嶮絕無微徑。淙潺有細流。寒巖依作屋。墮毳拾爲裘。木客求相識。毛人約共遊。百年如一瞬。塵世幾公侯。

楊庭秀寄南海集

俗子與人隔塵劫。何啻相逢風馬牛。夜讀楊卿南海句。始知天下有高流。

又

飛卿數闋嶠南曲不許劉郎誇竹枝四百年來無復繼如今始有此翁詩溫飛卿南鄉子九首其工不減夢得竹枝

夜坐示桑甥十韻

好詩如靈丹不雜羶葷腸子誠欲得之潔齋祓不祥食飲屑白玉沐浴春蘭芳蛟龍起久蟄鴻鵠參高翔縱橫開武庫浩蕩發太倉大巧謝雕琢至剛反摧藏一技均道妙佻心詎能當結纓與易簪至死猶自強東山七月簫萬古真文章天下有精識吾言豈荒唐

夢回

病骨便衾暖羈懷怯夢回鐘殘燈燼落香冷雨聲來老抱憂時志狂非濟世材明朝入冬假燒兔薦新醅

醉中草書因戲作此詩

賜休暫解簿書圍醉草今年頗入微手挹凍醪秋露重卷翻狂墨瘦蛟飛臨池勤苦今安有漏壁工夫古亦稀穉子問翁新悟處欲言直恐泄天機

閑步至鞠場值小雪

倒盡床頭酒半罍笑呼筇杖共閑行梅花照水爲誰瘦雪片倚風如許輕孟德遇冬思射獵廣文垂老謝才名歸來跨火西窗下獨數城樓長短更

張季長學士自興元遣人來因詢梁益間事悵然有感

長記殘春入蜀時嘉陵江上雨霏微垂頭驢瘦悲鈴馱截道狐奔脫獵圍曉度市橋花欲語晚投山驛石

能飛。杜鵑言語元無據。悔作東吳萬里歸。

東齋夜興

山城殘角伴疎鐘。擁褐頽然一病翁。紙帳燈明燧龜甲。銅瓶火熟起松風。雨來尤覺睡味美。酒後不知愁思空。忽憶江湖泊船夜。號鳴避弋鬧羣鴻。

烏龍雪

烏龍如真龍。安尾臥江磧。時時登樓望。爪尾略可識。今朝事大異。千嶂忽如失。遙知重雲外。已有雪數尺。頗念采薇人。清坐焉得食。裹飯欲問之。矯首空峭壁。念昔故山時。僵臥風雪夕。靜聞長松折。聲若裂巨石。天晴視巖澗。烏獸死如積。清夢不可尋。撫楯三太息。

曉出東城馬上作

曉出東城數幟紅。蒙茸狐貉擁衰翁。郊墟歉歲蕭條後。風雪窮冬慘淡中。耐辱已慚非士節。端憂未辦濟民窮。誕欺成俗真當懼。誰挽天河一洗空。

與建子振孫登千峯榭觀烏龍雪

二稗慧堪憐。猶賒志學年。能拋竹屨屨。來看玉蜿蜒。百念寬身後。餘生慰眼前。善和書幸在。它日要人傳。

述懷

尺寸雖無補縣官。此心炯炯實如丹。羯胡未滅敢愛死。尊酒在前終鮮歡。亞父抱忠撞玉斗。虞人守節待皮冠。縱言老病摧頽甚。壯氣猶憑後代看。

又

謗譽紛紛笑殺儂。此身本自等虛空。大鵬境界纖塵裏。曠劫年光掣電中。翻動煙霞長鑱在。招呼風月一尊同。是凡是聖誰能測。試問西隣織屨翁。禪家所謂睦州陳蒲鞵者。故居在郡治之西二百步。

到嚴十五晦朔郡釀不佳。求於都下既不時。至欲借書讀之。而寓公多祕不肯出。無以度日。殊惘惘也。

桐君故隱兩經秋。小院孤燈夜夜愁。名酒過於求趙壁。異書渾似借荊州。溪山勝處身難到。風月佳時事不休。安得連車載郭釀。金鞭重作浣花遊。

雨中獨酌

僻郡荒山下。高齋寒雨中。微波生酒綠。短焰擁爐紅。學廢悲身老。民窮祝歲豐。廚人羞雉兔。更憶喚鄰翁。雉兔登盤。頗懷隣里。

被酒徑臥比覺已五鼓矣

俗事驅人挽不回。經年無地濯氛埃。酒酣稍覺客愁破。睡覺忽聞山雨來。窗外樹寒無鳥宿。壺中水暖有梅開。五更欲起先惆悵。燭下文書已作堆。

燈下讀玄真子漁歌因懷山陰故隱追擬

石帆山下雨空濛。三扇香新翠箬蓬。蘋葉綠。蓼花紅。回首功名一夢中。

又

晴山滴翠水接藍。聚散漁舟兩復三。橫隸北。斷橋南。側起船篷便作帆。

又

鏡湖俯仰兩青天。萬頃玻璃一葉船。拈棹舞。擁蓑眠。不作天仙作水仙。

又

湘湖煙雨長蓴絲。菰米新炊滑上匙。雲散後。月斜時。潮落舟橫醉不知。

又

長安拜免幾公卿。漁父橫眠醉未醒。煙艇小。釣車腥。遙指梅山一點青。

送客至望雲門外

冬温頻作雨。晨冷頓催晴。嫩日滿江驛。淡煙籠郡城。憂民懷凜凜。謀己恥營營。投檄真須決。鄰翁約耦耕。

題城南堂故人陳亦顏少游四方晚乃卜居臨安城南因以城南名其堂屬余賦詩

山林恨與親友別。朝市不堪車馬喧。陳子調高無俗客。一塵卻要近修門。

又

借問城南老居士。新年樂事復何如。春寒催喚客嘗酒。夜靜臥聽兒讀書。

故山葛仙翁丹井有偃松覆其上天矯可愛寄題

葛翁煉丹一千年。翁去丹飛餘此泉。炯如古鏡不拂拭。俯聽缺甃時鏘然。老龍受命護泉臥。蜿蜒直恐從天墮。人言神物老愈靈。夜半聲酣風雨過。放翁還山亦何有。閉門吟歛龍爲友。客來相對聊曲肱。但酌此

泉勝酌酒。

估客樂

長江浩浩蛟龍淵。浪花正白蹴半天。軻峨大艫望如豆。駭視未定已至前。帆席雲垂大隄外。纜索雷響高城邊。牛車麟麟載寶貨。磊落照市人爭傳。倡樓呼盧擲百萬。旗亭買酒價十千。公卿姓氏不曾問。安知孰乘中書權。儒生辛苦望一飽。趨趨光範祈哀憐。齒搖髮脫竟莫顧。詩書滿腹身蕭然。自看賦命如紙薄。始知估客人間樂。

楚宮行

漢水方城一何壯。大路並馳車百兩。軍書插羽擁修門。楚王正醉章華上。璇題藻井窮丹青。玉笙寶瑟聲冥冥。忽聞命駕遊七澤。萬騎動地如雷霆。清晨射獵至中夜。蒼兕玄熊紛可藉。國中壯士力已殫。秦冠東來遣誰射。

妾命薄太白作此篇言長門宮事予反之。

妾命薄。早入天家侍帷幄。君王勤儉省宴游。寶柱朱弦塵漠漠。日長別殿承恩稀。旰食猶聞親萬機。宮中雖無珠玉賜。塞上不見煙塵飛。不須悲傷妾命薄。命薄卻令天下樂。

晚登千峯榭

只道文書無了日。也能擺撥上層臺。窗明山雪暮方作。露白野梅寒未開。老病真慚天下士。窮愁強覆掌中盃。兒曹莫怪憑闌久。得句何妨乘燭回。

晝睡

書獄徵租自笑忙。暫歸聊得憩匡床。屏圖夜雨孤舟句。枕帶秋風九日香。方睡菊花枕。一卷蠹書棲倦手。數聲殘角報斜陽。清泉浴罷西窗靜。更覺茶甌氣味長。

胸次鬱鬱偶取枯筆作狂草遂成長句

酒隱人間六十年。晚途斂板自傷憐。莊周聊寄漆園吏。梅福終爲吳市仙。方外酒徒盟尚在。囊中劍術老當傳。此心鬱屈何由豁。聊遣龍蛇落蜀牋。

休日與客燕語既去聽小兒誦書因復作草數紙

賜沐家居謝掾曹。暫將蕭散慰勤勞。琅琅應節兒書熟。疊疊生風客論高。玉屑名牋來濯錦。風濤奇石出臨洮。託盟翰墨吾安敢。揮灑淋漓自足豪。張季長寄洮研何元立寄蜀紙皆近到新定。

青城大面山中有二隱士。一曰譙先生。定字天授。建炎初以經行召至揚州。欲留之。講筵不可拜。通直郎直祕閣致仕。今百三十餘歲。巢居嶮絕。人不能到。而先生數年輒一出。至山前人有見之者。其一曰姚太尉。平仲字希晏。靖康初在圍城中。夜將死。士攻賊營不利。騎駿驟逸去。建炎初所。在揭榜以觀察使召之。竟不出。淳熙甲午乙未間。乃或見之於丈人觀道院。亦年近九十。紫髯長。委地喜作草書。蓋皆得道於山中云。偶成五字二首。託上官道人寄之。

寄謝譙夫子。今年一出無萬緣。隨夢斷百念與形枯。雲護巢松谷神呵。煨藥爐。憑高應念我。白首學徵租。  
右寄譙先生



太尉關河傑。飛騰亦遇時。中原方蕩覆。大計易差池。素壁龍蛇字。空山熊豹姿。煙雲千萬疊。求訪固難知。  
右寄姚太尉

累日多事不復能觀書感歎作此詩

我生無它長。所得靜而簡。出仕三十年。不殖一金產。四方到爲家。所向不容揀。南遊極巨海。西戍掠危棧。爲州亦何好。且復占仕版。俸不給淖糜。況敢事酒錢。晨興坐堂上。符檄高巉巖。藏書三萬軸。一字不到眼。胸中積磊塊。歎息誰爲鏟。浮生固如此。正可付一莞。

北窗

雲開見山雪。院靜聞松風。吏去曲肱臥。疑非塵世中。

讀范文正瀟灑桐廬郡詩戲書

桐廬朝暮苦匆匆。瀟灑寧能與昔同。堆案文書生眼黑。入京車馬漲塵紅。逢迎風月麴生事。彈壓江山毛穎功。二子年來俱埽迹。頽然堪笑一衰翁。

筓中偶得去年二月都下數詩

昨佩魚符入鳳城。春風處處聽鶯聲。欲尋舊友半爲鬼。重到西湖疑隔生。浮世正如投六簿。野人何意慕三旌。嚴州戍滿真當老。猶幸爲民死太平。

感寓

人生堂堂七尺身。本與聖哲均稱人。唐虞乃可讓天下。光被萬世常如新。哀哉末俗去古遠。斷喪太朴澆。

冬淳豆羹。簞食輒動色。攘竊乃至忘君親。錙銖必先計利害。詎肯冒死求成仁。不欺當從一念始。自古孝子爲忠臣。

征婦怨效唐人作

萬里安西久宿師。東風吹草又離離。玉壺貯滿傷春淚。錦字挑成寄遠詩。擊虜將軍方戰急。押衣敕使尙歸遲。粧臺寶鏡塵昏盡。髮似飛蓬自不知。

雪

瘴癘家家一洗無。更欣餘潤沃焦枯。花壺夜凍先除水。衣焙朝寒久覆爐。松頂積高時自墮。竹枝壓重欲相扶。雲開正值春風早。卻看晴光滿九衢。

寒夜思飲酒不果與緯同噉藥渣魚戲作

我老畏作病。盃酒久不持。讀書寒雨中。比夕頗思之。呼童欲洗酌。顧以病自疑。清坐歎寂寞。痛飲愁淋漓。三爵醒醉間。此理當徐思。一掬琴高魚。且復伴吾兒。

縱筆

凍研笑臞儒。雕弓隱獵徒。不成平趙魏。且可老江湖。顛頓頭雖禿。輪困膽尙麤。咸陽呼五白。何遽不能盧。

又

故國吾宗廟。羣胡我寇讎。但應堅此念。寧假用它謀。望駕遺民老。忘兵志士憂。何時聞遣將。往護北平秋。

歲晚盤尊索然戲書

經年薄宦客桐廬。市邑蕭然一物無。名酒不來惟飲溼。長魚難覓且焚枯。支離鶴骨寒添瘦。宛轉龜腸夜自呼。更與兒曹同一笑。燈前短褐拆天吳。

立春前四日謝雪方拜天慶庭中雲復作

珮玉珊珊謁衆真。竟煩一雪慰疲民。未看舞鶴隨飛蓋。先喜飄花集拜茵。耕壟土膏千耦出。市樓酒賤萬家春。使君老去悲才盡。詩句難追節物新。

桐江行

我來桐江今幾時。面骨嶒嶸鬢如雪。怒嗔不復有端緒。讒謗何曾容辨說。十年山棲卻水食。釀桂餐芝自芳潔。作官一飽仰紅腐。坐對盤殮常嘔噎。雪晴宿戒南山遊。剩要賦詠臨清流。將行復輟卻退坐。臺符吏牘令人愁。胸中崔嵬向誰吐。獨立憑高時自語。文章當以氣爲主。無怪今人不如古。

屢雪二麥可望喜而作歌

苦寒勿怨天雨雪。雪來遣我明年麥。三月翠浪舞東風。四月黃雲暗南陌。坐看比屋騰歡聲。已覺有司寬吏責。腰鎌丁壯傾閭里。拾穗兒童動千百。玉塵出籬飛屋梁。銀絲入釜須寬湯。寒醅發劑炊甍裂。新麻壓油寒具香。大婦下機廢晨織。小姑佐庖忘晚粧。老翁飽食笑捫腹。林下擊壤歌時康。

丁未除夕前二日休假感懷

掛冠神武莫躊躇。家具何妨載鹿車。怨謗相乘真市虎。技能已盡似黔驢。黃金散後猶耽酒。白髮生來更愛書。新歲定尋林下約。一觴一詠未成疎。

又

夢寄梅村竹塢間。不堪客裏見春還。潮生水欲通南澗。雪霽雲猶冒北山。病思過年應小減。官身得假未全閑。變名吳市男兒事。末路低回自笑孱。

假中閉戶終日偶得絕句

雨聲滴滴暮未已。苔暈重重寒更添。知是使君初睡起。清香一綫透疎簾。

又

老夫昔是青城客。酒肉淋漓豈本心。還我山家本來面。數拳春筍薦孤斟。仗錫山寄筍枯。一名筍兒拳。

又

官身常欠讀書債。祿米不供沽酒資。剩喜今朝寂無事。焚香閑看玉谿詩。

除夜雪

只怪重衾不禦寒。起看急雪玉花乾。遲明欲謁虛皇殿。廐馬蒙氈立夜闌。

又

北風吹雪四更初。嘉瑞天教及歲除。戊申元日卯初立春。半盞屠蘇猶未舉。燈前小草寫桃符。

戊申元日

白頭身世歎羈孤。一念兒時淚已濡。尚記爭先書鬱壘。豈知落後舉屠蘇。盃盤草草思鄰舍。車馬紛紛厭九衢。六十年非心自了。掛冠猶足補東隅。

初春感懷

關河謝遠遊。歲月迫歸休。敢恨驥伏櫪。但思狐首丘。雪明窗誤曉。霜點鬢驚秋。羈旅饒愁思。誰憐季子裘。

閉閣

閉閣孤城賸放慵。桐江清絕勝吳松。雲收忽見北山雪。月落正聞西寺鐘。世味老來無奈薄。土思病後不勝濃。蓴羹豈止方羊酪。輕許平生笑士龍。

潺湲閣小立

飽食何曾補縣官。潺湲閣上倚闌干。水紋靴皺風初緊。花色鞵紅露未乾。薄酒愁邊供醉醒。故人夢裏話悲歡。孤城正在山窮處。過社今朝尙爾寒。

睡起至園中

欲掛衣冠萬事輕。不妨小住向山城。綠尊耐久常相伴。雪鬢纔生便放行。拂枕時時覓幽夢。倚闌日日聽新鶯。夕陽更有欣然處。來看青郊雨後耕。

### 卷第二十

上書乞祠

上書又乞奉祠歸。夢到湖邊自叩扉。此去敢辭依馬磨。向來真慣擁牛衣。致身途遠年齡暮。報國心存氣力微。誓墓那因一懷祖。人間處處是危機。

春殘

老墮空山裏。春殘白日長。庸醫司性命。俗子議文章。燭映一池墨。風飄半篆香。箇中有佳處。袖手看人忙。

三月二十日晚酌

暫因賜沐作閑身。太息纔餘一日春。委地落花新著雨。穿簾歸燕不生人。衛青此日怪長揖。王翰當年謀卜鄰。商略晚窗須小醉。朱櫻青店正嘗新。

次前韻

烏帽紅塵過去身。荒山野水又經春。殘年欲盡初聞道。薄宦宜休不問人。一局枯棋忘日月。數斟濁酒約比鄰。石帆山下菱歌斷。未歎臨風白髮新。

北窗閑詠

陰陰綠樹雨餘香。半捲疎簾置一牀。得祿僅償除酒券。思歸新草乞祠章。古琴百衲彈清散。名帖雙鉤揭硬黃。夜出灞亭雖跌宕。也勝歸作老馮唐。

休日留園中至暮乃歸

盡道官身屬太倉。未妨寄傲向林塘。綠波春漲羣魚樂。清露晨流蔓草香。閑試名弓來射圃。醉盤驕馬出毬場。長城萬里知誰許。看鏡空悲兩鬢霜。

北窗病起

一飢可忍萬緣輕。況復幽窗疾漸平。更事天公終賞識。欺人鬼子漫縱橫。道邊塵起頻障扇。門外波清剩

濯纓不爲褊心憎薄俗。客星祠下是歸程。

自東津泛舟至桐溪

潮生東西津。雨暗上下塔。蕭蕭亂菰蒲。拍拍起鳧鴨。吾船雖褊小。尙可著一榻。溪風吹醉頰。高枕墮紗帽。南山浮溼翠。偃蹇呼不答。安得青蓮公。傑句爲彈壓。

遊客至大浪灘上

小壟瓜蔓綠。短籬梅子黃。曉風掠水來。吹我醉面涼。平生蕭散意。未覺將迎忙。溪山供一笑。客主可相忘。寧當倒手版。聊復據胡床。太平豈無象。麥飯家家香。我歸亦何有。養氣猶軒昂。那因五斗陳。坐變百鍊剛。

郊行

小雨東郊氣象新。蕭蕭清吹爽衣巾。並谿密竹巧藏寺。夾道新麻高沒人。老厭簿書愁欲睡。病疎盃酌渴生塵。桐君山路無多遠。元自知津莫問津。

夏雨

東風吹雨溪上來。北山出雲以應之。嚴州城中三日雨。朝暮點滴無休時。向來秧底乾欲裂。白水漫漫俄盈陂。豚肩覆豆巫醉飽。龍骨挂壁農遨嬉。今年蠶麥收數倍。繭大如瓮麥兩岐。西成在眼又如此。還鄉鼓腹歌淳熙。待去受代纔四十日。

雨中作

礎潤雲生五月中。山城細雨晚空濛。讀書雖恨此身老。把酒尙思吾輩同。積潤畫圖昏素壁。漬香衣幘覆

熏籠新晴不用占鐘鼓。以聽林梢淅淅風。

醉題

不學空門不學仙。清樽隨處且陶然。人情正可付一笑。生世元知無百年。白首難陪東閣客。清風自足北窗眠。歸耕只要無人問。安用文章海內傳。

有懷青城霧中道友

雪谷孤松自鬱然。紛紛朝困但堪憐。坐更拂石芥城劫。時說開皇龍漢年。淡煮藜羹天送供。閑拖藤杖地行仙。笑看王室中興後。更約長安一醉眠。

梅雨初晴迓客東郊

霽色澄鮮已斷梅。江郊隱隱尙輕雷。層巒正對孤城落。健席遙看大艦來。幼婦髻鬟簪早稻。近村坊店賣新醅。吾行在處皆詩本。錦段雖殘試剪裁。

晚歸

暑雨初晴日。江臯欲暮天。鴉棲沙際樹。人喚渡頭船。病骨羸將折。昏眸困欲眠。市橋燈火鬧。且復喜豐年。

休日登千峯榭遇大風雨氣象甚偉

今日逢休沐。憑高且暫閒。風聲初捲野。雨氣已吞山。疾病臨觴嬾。塵埃得句慳。西征忽在眼。河勢抱函關。

雨中獨坐

馬目山頭雨脚昏。龍津橋下浪花翻。年豐郡僻無公事。一炷清香晝掩門。



舊識姜邦傑於亡友韓无咎許近屢寄詩來且以无咎平日倡和見示讀之愜然作此詩附卷末  
須溪本作嚴州贈姜梅山

故人玉骨已生苔。謂南澗公。邂逅逢君亦樂哉。湖寺繫舟無夢去。京塵馳騎有詩來。醉中不敢教兒誦。看處常須浴手開。久矣世間無健筆。相期力幹萬鈞回。

釣臺見送客罷還舟熟睡至覺度寺

抽身簿書中。茲日睡頗足。縹緲桐君山。可喜忽在目。紛紛衆客散。杳杳一筇獨。昔如脫淵魚。今如走山鹿。詩情森欲動。茶鼎煎正熟。安眠簾八尺。仰看帆十幅。逍遙富春飯。放浪漁浦宿。送老水雲鄉。羹藜勿思肉。

泛富春江

雙鷁搖江疊鼓催。伯符故國喜重來。秋山斷處望漁浦。曉日昇時離釣臺。官路已悲捐歲月。客衣仍悔犯風埃。還家正及雞豚社。剩伴鄰翁笑口開。

宿漁浦

東歸剡曲只三程。旅泊還如萬里行。燈影動搖風不定。船聲鞞鞫浪初生。曳裾非復白頭事。瞑目那求青史名。歸去若爲消暮境。一蓑煙雨學春耕。

泝小江飯舟中

老作孤舟客。秋濤漲小江。林昏見飛燐。村近有驚尨。天濶三更月。篷低一尺窗。魚殮雖草草。聊喜到吾邦。  
乞祠久未報

聖朝未許領叢祠。擁褐清羸不自支。鄧禹有靈應笑拙。周公無夢固知衰。得閑要及身安日。到死應無睡足時。七百日來塵滿抱。今朝湔祓有新詩。

七月十日到故山削瓜淪茗脩然自適

鏡湖清絕勝吳松。家占湖山第一峯。瓜冷霜刀開碧玉。茶香銅碾破蒼龍。壯心自笑老猶在。狂態極知人不容。擊壤窮閭歌帝力。未妨堯舜亦親逢。

曉興

亂蟬嘒新秋。老木立清曉。我亦岸綸巾。寄傲萬物表。大千藏粒粟。浩劫過飛鳥。癡子居其間。利欲自纏繞。可憐榮進意。未向蓋棺了。浮名更嚇鬼。白聖寫丹旆。我於斯世事。看破自少小。老矣更何求。歸哉憩林沼。

感秋

會稽八月秋始涼。梧桐葉落覆井床。月明縞樹遶驚鵲。露下溼草啼寒螿。丈夫行年過六十。日月雖短志意長。匣中寶劍作雷吼。神物那得終摧藏。君不見昔時東都宗大尹。義感百萬虎與狼。疾危尙念起擊賊。大呼過河身已僵。宗汝霖垂死尙部勒諸將北伐忽大呼過河者三隨即殞絕。

秋夜有感

候蟲何唧唧。歲晚聲出壁。不惟嬾婦驚。感此白頭客。壯年事征戍。萬里不得息。揚颿凌秋濤。策馬赴山驛。日照蛟鼉涎。雪印豺虎迹。誰知七尺軀。幸脫九死厄。前年補畿郡。入對瞻玉色。報恩無死所。再拜衰淚滴。卽今故山歸。愈歎老境逼。不眠中夜起。仰視星歷歷。中原何時定。銅駝臥荆棘。滅胡恨無人。有復不易識。

五鼓入城

道旁竹樹露如傾，帶睡悠悠十里行。  
曉色未分煙尙重，壓城樓閣已崢嶸。

飯罷忽鄰父來過戲作

旋炊香稻鬻新菰，飯飽逍遙樂有餘。  
茶味森森留齒頰，香煙郁郁著圖書。  
毛皮尙在寧知我，鱗甲深藏莫問渠。  
賴有鄰翁差耐久，雨畦頻喚共攜鉏。

秋夜讀書

一雨濯殘熱，秋風忽已深。  
青燈照空廊，重露滴高林。  
危坐讀周易，會我平生心。  
夜分徐掩卷，閑弄床上琴。  
簾外初斜河，屋頭已橫參。  
人生每如此，利欲安能侵。

夜坐忽聞村路報曉鐵牌

何人叩鐵警農耕，炊飯家家起五更。  
也似早朝風雪裏，遙聽宮漏下宮城。

又

秋氣淒涼霧雨昏，老書生病臥孤村。  
五更不用元戎報，片鐵錚錚自過門。

白雲自西來過書巢南窗

眠山千里青未了，恨隔長江不到吳。  
羈雲冉冉吾舊識，安得挽之來坐隅。

贈竹十韻

放翁小築湖西偏，虛窗曲檻無炎天。  
人間乃有真富貴，遶舍十萬碧玉椽。  
連林娟娟泫清露，高枝裊裊搖

蒼煙常憂俗客觸新粉。屢戒園丁傷逸鞭。涼生尊罍消午醉。聲撼窗扉驚晝眠。春殘斷土得美苗。氣壓卿相食萬錢。爾來作吏若墮甕。每一夢到心悽然。還家再見卻恹恹。塵土何地從躡仙。囊中幸藏餐玉法。欲屏萬事相周旋。更當待月出東嶺。坐石泠泠揮響泉。

雜感

自古文章與命仇。功名身外更悠悠。一從識得元無事。窮死逢人不說愁。

又

小軒幽檻雨絲絲。種竹移花及此時。客去解衣投臥榻。半醒半醉又成詩。

又

少年意氣與春爭。朱彈金鞭處處行。誰信卽今空谷裏。旋租黃犢學躬耕。

又

自洗銅壺試玉醅。小軒風月爲徘徊。此心未與年俱老。猶解逢花眼暫開。

又

側帽垂鞭小陌東。名花迎笑一枝紅。啼鶯驚斷尋春夢。惆悵新霜點鬢蓬。

入城寓楊開元

羸僮倦馬困長堤。借榻禪房日未西。熟睡覺來閒隱几。庭楸陰轉乳鴉啼。

夜出偏門還三山

月行南斗邊。人歸西郊路。水風吹葛衣。草露溼芒履。漁歌起遠汀。鬼火出破墓。淒清醒醉魂。荒怪入詩句。到家夜已半。佇立叩蓬戶。穉子猶讀書。一笑慰遲暮。

四鼓酒醒起步庭下

酒解夜過半。出門步中庭。天高河漢白。月淡煙霧青。重滴竹杪露。疎見樹罅星。壞甃啼寒蟬。深竹明孤螢。秋晚雖未霜。蠹葉時自零。四序逝不留。慨然感頽齡。平生茅一把。不博帶萬釘。鷗溝謝拍拍。鴻路追冥冥。

感憤秋夜作

月昏當戶樹突兀。風惡滿天雲往來。太阿匣藏不見用。孤憤書成空自哀。吾輩赤心本貫日。昔人白骨今生苔。榮河溫洛不可見。青海玉關安在哉。

反感憤明夜讀前作而悲乃復作此自解

膊膊庭樹雞初鳴。嚙嚙天衢雁南征。百年朝露豈長久。萬事浮雲常變更。出處有心終有愧。聖賢無命亦無成。西疇雖薄可自力。雙犢且當乘雨耕。

東齋

著腳紅塵已恨深。便應畢世住山林。貴人自作宣明面。老子曾聞正始音。議論坐狂當永棄。簿書緣病復難任。東齋幽寂憑誰畫。開幔床橫一素琴。

雨夜四鼓起坐至明

門巷冷如冰。生涯淡似僧。小窗愁夜雨。孤影怯秋燈。林鶴棲仍起。山童喚不應。悠然坐待旦。息倦倚書牕。

夜讀兵書

八月風雨夕。千載孫吳書。老病雖憊甚。壯氣頗有餘。長纓果可請。上馬不躊躇。豈惟慶皋蘭。直欲封狼居。萬乘久巡狩。兩京盡丘墟。此責在臣子。憂愧何時摅。南鄭築壇場。隆中顧草廬。邂逅未可知。旄頭方掃除。

老歎

百年逝不留。萬事本難料。夜行鐘漏迫。但取賢達笑。頗疑功名事。造物付年少。歸休莫問人。曉鏡勤自照。

秋霽

灑氣明山川。霽色滿天地。西風吹我衣。忽有萬里意。中原運當平。所要在得士。餘年猶幾何。棄置復棄置。

齋中聞急雨

一味疎慵養不才。飯蔬亦已能銜盃。衡茆終日人聲絕。臥聽芭蕉報雨來。

老病追感壯歲讀書之樂作短歌

少年志力強。文史富三冬。但喜寒夜永。那知睡味濃。庭樹風淅淅。城樓鼓鼗鼗。自鞭不少貸。凍坐聞晨鐘。探義劇攻玉。摛文笑雕龍。落紙筆縱橫。圍坐書疊重。得意自吟諷。清悲答莎蛩。飢腸得一甌。美如紫駝峯。俯仰五十年。于世終不逢。夜半起飯牛。頽然成老農。束書不更讀。蠹簡流塵封。世無袁伯業。太息吾何從。

閑中戲書

糲飯從來不願餘。還山喜遂此心初。挽河盡洗彈冠念。閉戶閑離插架書。一榼不妨從客飲。數椽也復是吾廬。少游細看猶多事。安用人間下澤車。

又

少年拜舞綴庭紳。曾見中天日月新。金印終歸妄校尉。白頭仍是斥仙人。修營香火三生願。收拾風波九死身。豈但漁樵與爭席。海邊漚鳥亦相親。

又

釣竿風月寄滄洲。醉髮髣髴荻葉秋。仕進世誰知我嬾。功名命不與人謀。衰遲更覺歲時速。疎賤空先天。下憂病骨未銷讒未已。聊須周易著牀頭。

采藥

簣子編成細箬新。獨穿空翠上嶙峋。丹砂巖際朝曦日。狗杞雲間夜吠人。絡石菖蒲蒙綠髮。纏松薜荔長蒼鱗。金貂謁帝我未暇。且作人間千歲身。

過猷講主桑瀆精舍

寂寞衡門傍水開。放翁曳杖此徘徊。林疎時見釣篷過。風急忽聞菱唱來。講罷繩床懸塵柄。齋餘童子供茶盃。解衣許我閒摩腹。又作幽窗夢一回。

自桑瀆泛舟歸三山

端爲身閑覺日長。不嫌兒輩笑清狂。湖光潏潏歸舟疾。雨點霏霏醉頰涼。斷徇苦生人喚渡。孤村霜近稻登場。宦情不獨今日薄。游子從來念故鄉。

訪野人家

山入柴門窄。橋通野路長。羣童挑燕筍。幼婦采雞桑。淳古非今俗。留連到夕陽。盤飧敢辭飽。滿箸藥苗香。

塞上曲

秋風獵獵漢旗黃。曉陌霜清見太行。車載甕廬駝載酒。漁陽城裏作重陽。

又

將軍許國不懷歸。又見桑乾木葉飛。要識君王念征戍。新秋已報賜冬衣。

又

金鼓轟轟百里聲。繡旗寶馬照川明。王師仗義從天下。莫道南兵夜斫營。

又

老矣猶思萬里行。翩然上馬始身輕。玉關去路心如鐵。把酒何妨聽渭城。

硯湖井引

余得英石數峯環立。其中凹處可容一盂。因以瀦水代硯滴。名之曰硯湖。且爲賦詩。

羣山環一湖。湖水綠溶漾。微風掠窗過。亦解生細浪。餘流浸翠麓。倒影寫青嶂。自然出天工。豈復煩巧匠。病夫屏盃酌。不遣運酒舫。時時挹清泚。筆墨助豪宕。帖成龍蛇走。詩出雷雨壯。從今几硯旁。一掃蟾蜍樣。

泛湖

筆牀茶竈釣魚竿。瀲灩平湖淡淡山。浪說枕戈心萬里。此身常在水雲間。

寓蓬萊館



桐葉吹殘蕉葉黃。驛窗微雨送淒涼。長安許史無平素。莫恨棲棲立路旁。

又

古驛蕭蕭獨倚闌。角聲催晚雨催寒。殘年遇合應無日。猶說新豐強自寬。

夜還驛舍

樓上琴琴初發更。斷雲收雨旋成晴。市橋新漲搖燈影。驛路殘泥壯屐聲。闌闌變遷非曩日。情懷牢落感餘生。高秋病起猶能醉。剩買官醅樂太平。

舟中大醉偶賦長句

過江何敢號高流。偶與俗人風馬牛。畫楫新搖嚴瀨月。清尊又醉戴溪秋。壯心無復在千里。老氣尙能橫九州。古寺試求三丈壁。爲君驅筆戰蛟虬。

行飯至新塘夜歸

門前徙倚尙餘霞。湖上歸來月滿沙。雲溼一聲新到雁。林昏數點後棲鴉。淒迷籬落開寒菊。鄭重比鄰設夜茶。早議挂冠君會否。暮年心念不容差。

雲門感舊

總角來遊老未忘。背人歲月去堂堂。禪松看到偃霜蓋。廢寺憶曾開寶坊。佛几古燈寒焰短。齋廚新粟午炊香。興闌未忍登車去。更倚溪橋立夕陽。

若耶溪上

微官元不直鱸魚。何況人間足畏途。今日溪頭慰心處。自尋白石養菖蒲。

又

九月霜風吹客衣。溪頭紅葉傍人飛。村場酒薄何妨醉。菰正堪烹蟹正肥。

秋雨頓寒偶書

羈懷不醉自昏昏。臥對青燈獨掩門。沙雁帶寒來古澤。林鳩催雨暗孤村。數椽蟹舍償初志。九陌塵衣洗舊痕。自歎一生書裏活。暮年無力濟黎元。

新晴泛舟至近村偶得雙鱸而歸

秋風一夜老汀蘋。剡曲稽山發興新。青嶂曾爲身後塚。扁舟聊作畫中人。園林搖落知寒早。父老逢迎覺意真。歸舍不妨成小醉。眼明細柳貫霜鱗。

上書乞祠輒述鄙懷

干祿本代耕。窮達敢自必。早遇高皇帝。九品對宣室。安懷犬馬心。縻緯不暇恤。上恩等天地。腰領免斧鑕。旋屬紹興末。賜谷瞻出日。賤臣復何幸。便殿首造膝。煌煌帝堯典。推擇首秉筆。愚忠雖懇款。野性實坦率。飄然去周行。湖海抱沉疾。遠遊客窮塞。亭障秋蕭瑟。聖君終記省。萬里忽乘駟。同朝久凋謝。存者不十一。造廷故抱暗。下殿衰涕溢。蹉跎又十載。憂患豈易述。流年不貸人。白髮日夜密。冠雖未卽挂。馭已不容叱。尙覬公朝恩。養老霑散秩。閉門教子孫。志願真永畢。

泛湖上雲門

三百里湖秋渺然。是間可以著釣船。浩歌莫過石帆下。爛醉夜泊樵風邊。樵風溼在若耶溪。鏡湖之間。茫茫沙月忽側墮。裊裊山氣時孤騫。冥鴻遠舉謝斯世。白鷗自放全其天。幽棲幸脫市朝械。捷徑那著功名鞭。人生各自適意耳。稷禹巢許知誰賢。

書歎

世態秦欺楚。交情越視秦。寧教待羝乳。不耐望車塵。書積高圍坐。花繁亂插巾。那須散人號。已是葛天民。

枕上作

寒夜臥林廬。蕭然適有餘。蟲悲號壞壁。燈暗守殘書。養拙天知我。安貧老似初。雖非漆園吏。也作蝶蘧蘧。

老病無復宦情或者疑焉作此示之

病思蕭條豈獨今。十年前已鬢霜侵。舊交略盡形吊影。薄宦宜休口語心。老驥已甘當伏櫪。窮猿況是急投林。別君徑入亂雲去。後日相思何處尋。

拄杖

放翁拄杖具神通。蜀棧吳山興未窮。昨夜夢中行萬里。蓮華峯上聽松風。

北望

北望中原淚滿巾。黃旗空想渡河津。丈夫窮死由來事。要是江南有此人。

歲晚感懷

利名爭奪兩皆非。生世寧殊露易晞。老冉冉來誰獨免。冢壘壘處會同歸。聽歌莫惜終三疊。縱獵何妨更

一團醉臥日高呼不醒。笑人霜曉束朝衣。

大雨中作

北風撼山勢岌岌。老夫倚杖檐前立。貪看白雨掠地風。飄灑不知衣盡溼。當年入朝甫三十。十丈胡塵叩江急。屬聞蠟彈遣檄書。亟壞布裳縫袴褶。卽今白髮不可數。破屋頽垣窘風雨。汝生汝死問者誰。人雖不問心自悲。

繫舟平水步

舟尾參差野岸橫。屐聲穿市得閑行。雨昏茆店炊煙溼。人語蓬窗續火明。枝上橙香初受摘。擔頭菰脆正堪烹。漁樵自是平生意。不爲衰遲薄宦情。

初到行在

六十之年又四年也。騎瘦馬趁朝天。首陽柱下執工拙。從事督郵俱聖賢。筆墨有時閑作戲。功名到底是無緣。都城處處園林好。不許山翁醉放顛。

還都

平生薄名宦。所願得早休。奔走三十年。鏡中霜鬢秋。歸踏長安道。恍然皆舊遊。處處見題名。始驚歲月遒。西湖隔城門。放浪輸白鷗。當時見種柳。已足繫巨舟。挂冠當自決。安用從人謀。勿以有限身。常供無盡愁。

宿監中偶作

流落歸來兩鬢絲。此生真媿北山移。數殘宮漏寒無寐。開盡梅花病不知。同舍破甘醒宿酒。故人折簡索

新詩生涯可笑清如許。枉是京塵撲馬時。譚德稱有簡僮和詩。

#### 四鼓出嘉會門赴南郊齋宮

客遊梁益半吾生。不死還能見太平。初喜夢魂朝帝所。更驚老眼看都城。九重宮闕晨霜冷。十里樓臺落月明。白髮蒼顏君勿笑。少年慣聽舜韶聲。

#### 題張野夫監簿大招圖

此生只合老漁樵。扶病誰令趁早朝。開卷未終三太息。羈魂零落恐難招。

#### 簡譚德稱監丞

廣都江上送舟行。淚灑春風別少城。冉冉幾經新歲律。依依猶有舊交情。塵冠當挂彈何用。革帶頻移瘦自驚。剩欲約公風雨夜。一燈相對話平生。

#### 致齋監中夜與同官縱談鬼神效宛陵先生體

五客圍一爐。夜語窮幻怪。或誇雷可斫。或笑鬼可賣。或陳混沌初。或及世界壞。或言修羅戰。百萬起睚眦。餘談恣搜抉。所出雜細大。風雲墮皮幘。幽坎窺鐵械。羣號起古聚。孤泣出空廡。妖狐冠燭髓。掩袂弄姿態。空轉伏逸囚。夜半出竊嘍。雖云多聞益。頗犯綺語戒。不如姑置之。投枕休困憊。明當掛祠衣。僕僕愁亟拜。

#### 夜歸

飲酒不盡觴。觀棊不竟局。索馬踏街鼓。仰視月挂木。疾馳沿河隄。不記幾坊曲。到家四鄰寂。往往睡已熟。天香餘裊裊。佛燈猶煜煜。中庭雖一席。緩步意亦足。寒犬吠荆籬。棲鵲起叢竹。市聲從北來。始覺非林谷。

卻尋西窗書。開卷剪殘燭。官閑居更遠。一笑謝羈束。

次韻鄭唐老

宦遊早日闕相聞。一面那知乃爾勤。秋釣清灘方入夢。曉穿細仗又逢君。驟看落筆驚風雨。便擬同舟臥水雲。作意歸休還會否。暮年無力起斯文。

五鼓赴太社臘祭

霜寒裂屋瓦。月白射坊門。病骨愁看影。孤吟怯斷魂。飢鷹掣羈絆。老馬伏車轅。不奈清宵夢。殘蕪滿故園。

己酉元日

夜雨解殘雪。朝陽開積陰。桃符呵筆寫。椒酒過花斟。巷柳搖風早。街泥濺馬深。行宮放朝賀。共識慕堯心。

以亮陰免賀禮。

送潘德久使薊門

崑崙東分一枝渾。奔蹴砥柱經龍門。羲皇受圖撫上古。神禹治水開中原。三靈實扶藝祖業。萬國共仰東都尊。羣兒撞壤吁可歎。顧使殘虜今遊魂。因君試求出師路。孟津白馬應如故。不須更議繫河橋。北風正可乘冰渡。頗聞盧龍已數盡。復道飛狐合屯戍。轅門倘駐拂雲祠。烽火應過明妃墓。君歸解鞍藉芳草。細談塞北忘子老。讀書飲酒待賊平。萬丈旄頭方下掃。

我夢

我夢入煙海。初日如金鎔。赤手騎怒鯨。橫身當渴龍。百日京塵中。詩料頗闕供。此夕復何夕。老狂洗衰慵。

夢覺坐歎息。杳杳三茆鍾。車馬動曉陌。不覺睡味濃。平生擊虜意。裂背髮上衝。尙可乘一障。憑堞觀傳烽。晨起有感

痛飲可以豪。謝病可以高。計之顧不審。老與世俗麀。丈夫本自許。四十擁旌旄。上馬不回顧。賊穴窮腥臊。渭橋恥未雪。孰謂弓可囊。此志竟悠悠。徂歲行滔滔。一官客長安。燭下束弊袍。豈惟歎龍鍾。行恐悲焄蒿。吾曹議古人。後亦觀吾曹。浮雲易變滅。公議終堅牢。

南省宿直

檐角參差散暮霞。重門鎖斷市聲譁。風經綠樹鴉棲穩。月入空廊柱影斜。藤紙靜臨新獲帖。銅瓶寒浸欲開花。誰知今夕幽窗夢。又撈扁舟上若耶。

又

頽然靜對北窗燈。識字農夫有髮僧。但遣奚奴持古錦。何須侍史護青綾。塵埃奔走無由息。疾病侵陵不自勝。猶喜眼中多壯觀。時看雲海化鯤鵬。

卷第二十一

夜歸塲街巷書事

近坊燈火如晝明。十里東風吹市聲。遠坊寂寂門盡閉。只有煙月無人行。誰家小樓歌惱儂。餘響縹緲縈簾櫳。苦心自古乏眞賞。此恨略與吾曹同。歸來空齋臥淒冷。燈前病骨巉嶮影。獨吟古調遣誰聽。聊與梅

花分夜永。

馬上作

三十年前客帝城。城南結騎盡豪英。湖山冷落悲陳迹。文字流傳付後生。衰老更禁新臥病。塵埃時拂舊題名。馬頭風捲飛花過。又得殘春一日晴。

行在春晚有懷故隱

老辱明時乞一官。逢春惆悵獨無歡。舊人零落北音少。市肆蕭疎民力殫。歸計已栽千箇竹。殘年合挂兩梁冠。石帆山路頻回首。箭茁蓴絲正滿槃。

儀曹直廬

春晚氣始和。微雲淡朝陽。開軒面小庭。露瀆薔薇香。遊絲卷欲盡。忽復百尺長。而我正遺事。枕藉書一牀。讒波雖稽天。未遽妨人狂。惟當傾綠酒。莫待熟黃梁。

讀書

兩兩星躔九九車。天津笑我醉騎驢。床頭正可著周易。架上何妨抽漢書。幸有古人同臭味。不嫌兒子似迂疎。頽然白髮雖堪鄙。耐事禁愁卻有餘。

小昭慶院講僧舊在都下與之相從今沒已久見畫像於院中作詩弔之

曩歲曾陪夜講燈。伏犀插腦齒如冰。假令重見應難識。遺像瓏然一老僧。

晨入省中偶書



清風拂畫簾。初日照素壁。花枝蝶小憩。草葉露時滴。房櫳闕無人。溝水聲激激。摩挲語枯筇。伴我住幽寂。

春晚

今年病過春。得健春欲盡。更堪風雨橫。紅溼棲綠潤。一笑本自難。造物復爾吝。榆莢堆平塔。柳絮飛作陣。塵埃生破榼。霜雪滿衰鬢。平生慕陶謝。著語終不近。

觀潮送劉監至江上作

江平無風面如鏡。日午樓船帆影正。忽看千尺涌濤頭。頗動老子乘桴興。濤頭洶洶雷山傾。江流卻作鏡面平。向來壯觀雖一快。不如帆映青山行。嗟余往來不知數。慣見買符官發渡。雲根小築幸可歸。勿爲浮名老行路。

新晴馬上

一劍飄然萬里身。白頭也復走京塵。畫樓酒飾滴殘雨。綠樹鶯聲催暮春。絕塞勒回勳業夢。流年換盡市朝人。此生安得常強健。小艇湘湖自采蓴。湘湖在蕭山縣。

過六和塔前江亭小憩

斷岸孤亭日暮時。欄邊聊試葛巾欹。偶觀挂席乘潮快。便覺懸車納祿遲。痛飲相如無奈渴。清言叔寶不勝羸。年來親友凋零盡。惟有江山是舊知。

春夕睡覺

破衫羸馬老黃塵。人自衰遲歲自新。積雨恐侵春甲子。昏燈嬾守夜庚申。花枝影轉欹殘月。鼻鼾聲撼

四鄰自笑功名猶有夢，散關金鼓震函秦。

送霍監丞出守盱眙

淮浦鱗鱗浸碧天，卽今誰料作窮邊。空聞甌脫嘶胡馬，不見浮屠插霽煙。亭障久安無檄到，盃觴頻舉有詩傳。長城萬里英雄事，應笑窮儒飽晝眠。

寄題徐載叔秀才東莊東莊乃藏書之所

次公醒狂何必酒，直諒多聞俱可友。萬籤插架號東莊，多稼連雲亦何有。今年偶入長安城，不識貴人呼作卿。南臺中丞埽榻見，北門學士倒屣迎。郎官酸寒誰肯顧，君來下馬談至莫。東莊雖富未可矜，更要縱橫開武庫。

入省

點點輕花墮綠盃，翩翩羸馬犯黃埃。眼邊好句等閑過，夢裏故人時一來。玉塞請行狂故在，霜髭自照老相催。今朝涼冷文書少，隱几南窗聽轉雷。

出省

五更東帶聽朝雞，出省還家日已西。酒市雨餘青旆重，河橋風爽紫駟嘶。久慙旅飯糜倉粟，常憶新橙擣膾齏。萬事似棋聊爾耳，年來著數不勝低。

和周元吉右司過弊居追懷南鄭相從之作

梁益東西六十州，大行臺出北防秋。閱兵金鼓震河渭，縱獵狐兔平山丘。露布捷書天上去，軍諮祭酒幄

中謀豈知今日詩來處。日落風生蘆荻洲。

尤延之侍郎屢求作遂初堂詩。詩未成。延之去國。因以奉送。

印何纍纍。綬若若。只堪人看公何樂。忽然振施開布颿。慰滿平生一丘壑。遂初築堂今幾時。年年說歸真得歸。異書名刻堆滿屋。欠伸欲起遭書圍。捨之出遊公豈誤。綠髮朱顏已非故。請將勳業付諸郎。身踐當年遂初賦。

送張野夫寺丞牧滁州

皇天方爨九州裂。建隆真人仗黃鉞。陣雲冷壓清流關。賊壘咿嚶氣如髮。逋誅猾虜入檻車。北風吹乾草頭血。一龍上天三百年。舊事空聞遺老說。金印斗大誰作州。公子玉面蒼髯虬。賦詩健筆挾風雨。論兵辯舌森戈矛。別君帳飲灞橋頭。長歌爲君寬旅愁。戰場遺迹儻可畫。尺素寄我關河秋。

史院書事是日丞相過局

信史新修稿滿床。牙籤黃靶帶芸香。中人馳賜初宣旨。丞相傳呼早出堂。皇祖聖謨高萬古。諸賢直筆擅三長。孤臣曾趣龍墀對。白首爲郎只自傷。紹興辛巳嘗蒙恩賜對。今三十九年矣。

病中數辱曾無逸架閣見問。今日忽聞徙居。走筆奉簡。因致卜鄰之約。

病羸不辦攬衣迎。剝啄空慙扣戶聲。凡藥豈能驅二豎。清心幸足制三彭。巷南僦屋儻可問。歲晚囊衣吾亦行。不爲朝天愁路澀。夜窗燈火要尋盟。

喜楊廷秀祕監再入館

公去蓬山輕。公歸蓬山重。錦囊三千篇。字字律呂中。文章實公器。當與天下共。吾嘗評其妙。如龍馬受韉。燕許亦有名。此事恐未夢。嗚呼大厦傾。孰可任梁棟。願公力起之。千載傳正統。時時醉黃封。高詠追屈宋。我如老蒼鶻。寂寞愁獨弄。杖屨勤來遊。雪霽梅欲動。

次韻和楊伯子主簿見贈

齋戒叩頭賤天公。幸矣使我爲枯蓬。枯蓬於世百無用。始得曠快乘秋風。此生安往失貧賤。白髮蕭蕭對黃卷。今人雖鄰有不覲。古人卻向書中見。猿啼月落青山空。舊隱夢寂思東蒙。不願峨冠赤墀下。且可短劍紅塵中。終年無人問良苦。眼望青天惟自許。可憐對酒不敢豪。它日空澆墳上土。文章最忌百家衣。火龍黼黻世不知。誰能養氣塞天地。吐出自足成虹蜺。渡江諸賢骨已朽。老夫亦將正丘首。杜郎苦瘦帽攔耳。程子久貧衣露肘。君復作意尋齊盟。豈知衰懦畏後生。大篇一讀我起立。喜君得法從家庭。鯤鵬自有天池著。誰謂太狂須束縛。大機大用君已傳。那遣老夫安注脚。杜與伯高。程有徵文若。皆近以詩文得名於諸公。而尤與予善。

簡何同叔

白髮都門客。青燈夜雪時。盡捐塵世事。細看月湖詩。格律冰霜敵。襟懷猿鶴知。吾儕端後死。此事要深期。

去國待潮江亭太常徐簿宋卿載酒來別

昨解魚符已徑歸。偶隨尺一起柴扉。暫留已媿黔吾突。久住空令緇客衣。外物紛紛何足問。故人眷眷莫相違。從今再見應無日。長與沙鷗共釣磯。

醉中作行草數紙

還家痛飲洗塵土。醉帖淋漓寄豪舉。石池墨瀋如海寬。玄雲下垂黑蛟舞。太陰鬼神挾風雨。夜半馬陵飛萬弩。堂堂筆陣從天下。氣壓唐人折釵股。丈夫本意陋千古。殘虜何足膏礮斧。驛書馳報兒單于。直用毛錐驚殺汝。

雪夜小酌

黃昏雲齊雪意熟。二更雪急聲簌簌。地爐對火得奇溫。兔醢魚鱸窮旨蓄。引盃且作稿面紅。脫帽不管衰鬢禿。浩歌三終徐自和。藏書萬卷方盡讀。從來本不擇死生。況復區區論禍福。雪晴著屐可登山。與子一放千里目。

卽事

暨壁編茅養病翁。五更擁褐聽霜風。老雞棲冷啼偏早。宿火灰深撥更紅。知我向來惟斷簡。會心終竟在孤篷。東歸已賣腰間劍。魯叟從今不諱窮。

到家句餘意味甚適戲書

天恐紅塵著脚深。不教經歲去山林。欲酬清淨三生願。先洗功名萬里心。石鼎鷓鴣閑煮茗。玉徽零落自修琴。晚來剩有華胥興。臥看西窗一炷沉。

雨後復小雪

雨雪來無已。冬春忽欲交。賤貧安淡薄。老鈍耐譏嘲。村酒兒能取。農書手自鈔。暮年真箇懶。屋漏旋添葺。

鯉魚行

鯉魚財三尺。淺水不覆脊。雖懷江湖樂。已歎刀几赤。長鯨之長幾千丈。雪蹴山傾萬重浪。縱遊不厭滄海寬。一躍已在青天上。身世局促古所哀。噉啣貪餌胡爲哉。人間溝瀆莫更顧。夜半變化乘風雷。

雪夜作

雪重從壓竹。竹折有奇聲。雪深亦莫埽。小窗終夜明。我老尙耐冷。開卷對短檠。龍茶與羔酒。得失不足評。但思被重鎧。夜入蔡州城。君勿輕癯儒。有志事竟成。

晨起

倦枕廉纖雨。幽窗料峭寒。溪柴旋篝火。野蕨鬪登槃。年老衣冠古。身閑宇宙寬。兒孫生我笑。趨揖已儒酸。鄉市小把柴。謂之溪柴。蓋自若耶來也。

野饋

經年倉粟厭陳陳。天遣香秔饋野人。黃耳輩生齋鉢富。白頭韭出客盤新。此生不復營三釜。一飽何曾羨八珍。尙媿古來高士在。盃羹無糝甑生塵。

醉中浩歌罷戲書

造物小兒如我何。還家依舊一漁蓑。穿雲逸響蘇門嘯。卷地悲風易水歌。老眼閱人真爛熟。壯心得酒旋消磨。傍觀虛作窮愁想。點檢霜髯卻未多。

朝雨

甲夜星照泥。平旦雲行西。小屋古澤中。天昏雨淒淒。避溼升我堂。垂翅閱老雞。所欣園中蔬。冒土青滿畦。門無今雨客。路滑愁長堤。一盃且復睡。物理何足齊。

春雨

苦雨何時止。微雲又作陰。傍簷時小立。隱几復微吟。枝重殘紅濕。隄平漲綠深。物華元自好。老病負登臨。

又

春愁無處避。春雨幾時晴。黯黯陰連月。蕭蕭滴到明。窗昏減書課。弦緩咽琴聲。何以娛幽獨。新醅手自傾。

記夢

夢裏都忘兩鬢殘。恍然白紵入長安。硃教紙熟修溫卷。僦得驢騎候熟官。紅葉滿街秋著句。青樓燒燭夜追歡。如今萬事消除盡。老眼摩挲靜處看。

野興

紅飯青蔬美莫加。鄰翁能共一甌茶。舍西日緊花房斂。港北風生柳脚斜。筇杖不妨閑有伴。茆簷終勝老無家。自驚七十猶強健。采藥歸來見暮鴉。

又

鬢邊莫笑久星星。造物常鍾我輩情。每帶餘醒蹋花影。又和殘夢聽鶯聲。軒窗風過書籤亂。洲渚潮生釣艇橫。韓子未除豪氣在。文章都待不平鳴。

杭州夜歸

昔如架上九秋鷹。今似窗間十月蠅。無復囊鞬思出塞。不妨粥飯略同僧。白蘋洲晚初回櫂。綠樹村深已上燈。莫謂陶詩恨枯槁。細看字字可銘膺。

又

野艇迢迢信所之。歸來常及欲昏時。陂塘煙重怨姑惡。林薄月明悲子規。出谷寺鐘初縹緲。穿籬續火已參差。欣然笑向麈門說。又了浮生一首詩。

或問余近況示以長句

天亦知予嬾是真。暮年乞與自由身。幽尋東浦鷺迎櫂。獨臥北窗鶯喚人。野卉滿頭狂取醉。草廬容膝樂忘貧。死時是處堪藏骨。不用要離更作鄰。

估客有自蔡州來者感悵彌日

洮河馬死劍鋒摧。綠髮成絲每自哀。幾歲中原消息斷。喜聞人自蔡州來。

又

百戰元和取蔡州。如今胡馬飲淮流。和親自古非長策。誰與朝家共此憂。

初夏郊行

小硯孤吟恐作愁。長堤曳杖且閑遊。破雲山踞千螺翠。經雨波涵一鏡秋。鉅妝青紅村步市。闌干高下寺家樓。去年此日君知否。十丈京塵沒馬頭。

重午



葉底榴花蹙絳繒。街頭初賣苑池冰。會稽不藏冰。賣者皆自行在來。世間各自有時節。蕭艾著冠稱道陵。  
夏日

赤日黃塵襤褸忙。放翁湖上獨相羊。竹梢露滴驚殘夢。荷蓋風翻送早涼。暑用酒逃猶有待。熱憑靜勝更無方。空齋一榻翛然臥。閑看衣篝起篆香。

睡起見楊花滿庭偶書

斷香裊裊傍窗紗。睡起蒼騰日未斜。堪歎一春風雨惡。今年四月見楊花。

梅雨

沐罷斜簪二十冠。斷雲殘靄暗江干。絲絲梅子熟時雨。漠漠楝花開後寒。剩采芸香辟書蠹。旋春麥麩續家餐。日長倦睫惟思閉。茗椀真須抵死寬。

醉歌

讀書三萬卷。仕宦皆束閣。學劍四十年。虜血未染鏑。不得爲長虹。萬丈掃寥廓。又不爲疾風。六月送飛雹。戰馬死槽櫪。公卿守和約。窮邊指淮淝。異域視京雒。於乎此何心。有酒吾忍酌。平生爲衣食。斂版靴兩腳。心雖了是非。口不給唯諾。如今老且病。鬢禿牙齒落。仰天少吐氣。餓死實差樂。壯心埋不朽。千載猶可作。

醉書秦望山石壁

秋雨初霽開長空。夜天無雲吐白虹。擘波浴海出日月。破山卷地驅雷風。崑崙黃流瀉浩浩。太華巨掌摩穹穹。平生所懷正如此。拜賜虛皇稱放翁。放翁七十飲千鍾。耳目未廢頭未童。向來楚漢何足道。真覺萬

古無英雄行窮禹迹亦安往。聊借曠快洗我胸。濤瀾屢犯蛟鰐怒。澗谷或與精靈逢。黃金鑄就決河塞。仔細頡頏利長安宮。不如醉筆掃青嶂。入石一寸豪健驚天公。

秋夜

藥餌扶衰疾。琴書返故園。陶公方止酒。樂令且清言。煙鳥宿沙際。露螢明草根。塵囂不到處。此意與誰論。

夜意

孤夢初回夜氣清。世塵掃盡覺心平。月沉洲渚漁歌遠。人語比鄰續火明。獨汲寒泉鳴細甕。靜聽漏鼓下高城。悠然坐待東方白。卻看軒窗淡日生。

蝸廬

小葺蝸廬使著家。槿籬莎徑任欹斜。爲生草草僧行脚。到處悠悠客泛槎。孤蝶惜衣晴曝粉。穉蜂貪蜜晚爭花。有書嬾讀吾堪愧。睡起何妨自澀茶。

子十年間兩坐斥。臯雖擢髮莫數而。詩爲首謂之嘲詠。風月旣還山。遂以風月名小軒。且作絕句。扁舟又向鏡中行。小草清詩取次成。放逐尙非餘子比。清風明月入臺評。

又

綠蔬丹果薦瓢尊。身寄城南禹會村。連坐頻年到風月。固應無客叩吾門。

題梅漢卿醉經堂

它人爛醉錦瑟傍。君獨醉心編簡香。沉酣骨髓春盎盎。如枕麴蘖羅盃觴。三萬牙籤插高架。五千黃卷撐

枯腸信哉名教有樂地。白首不入無功鄉。  
得親舊書問近況。以詩代書報之。

溪頭日日弄潺湲。敢料餘生竟得全。白簡免勞中執法。青銅罷算小行年。花前一笑頻開口。林下深藏永息肩。欲養金丹還嬾去。身今已是地行仙。

放逐

放逐雖慙處士高。笑譚未減少年豪。青山隨處有三窟。白首今年無二毛。正得筇枝爲老伴。盡將書帙付兒曹。飲酣自足稱名士。安用辛勤讀楚騷。

月下野步

空中磊落斗跨天。道旁荒寒月滿川。行歌驚起鷗鷺眠。三萬里在拄杖邊。敲門索酒太華前。飛渡黃河不須船。袖中短鐵青蜿蜒。昔曾巴丘從老仙。削平巖崖扶雲煙。此妙可得不可傳。雷聲殷殷電煜然。已覺遼碣無腥羶。雪花如席登祁連。歸來卻看東封年。

自詠

孤艇渺煙波。衡門暗薜蘿。衣冠醉學究。世有醉學究圖。毛骨病維摩。撫几時長喟。臨觴亦浩歌。無勞問蝸角。蠻觸正橫戈。

午睡起遇急雨

揩眼捫髻破晝眠。闌邊小立獨幽然。叢花雨打無飛蝶。高柳風驚有墮蟬。才略本居元子下。功名那計祖

生先。今朝會意君知否。目送飛雲揮五紘。

夜雨暴至

堂中虛窗雨氣入。堂前叢竹雨聲急。山童束縵走求火。屋漏惟愁打書溼。秋風穉稭九千頃。自鏡湖北際海壘地。凡九千頃。皆吾鄉上腴也。此夕真成傾玉粒。蹋歌作社約比隣。一飽今年可平揖。

睡起作帖數行

睡餘得清風。起坐傍書几。日長誰晤言。賴此管城子。欣然共遊戲。一笑我忘爾。羣鴻偶下集。但怪驚不起。古來翰墨事。著意更可鄙。跌宕三十年。一日造此理。不知筆在手。而況字落紙。三叫投紗巾。作歌識吾喜。

新秋

短鬢蕭蕭失舊青。此身已看作郵亭。新秋無限淒涼意。盡付風蟬與露螢。

秋興

去秋尙十日。軒窗夕已涼。露草黏溼螢。壞壁啼寒螿。丈夫志四海。臨書慨以慷。白髮忽如此。惟有歸耕桑。藥餌且枝梧。鄰曲相扶將。豈無甕中酒。老病不能觴。南山有歸處。歲晚柏已行。下從吾親游。此事歲月長。

又

無食苦日長。無衣念秋近。雖云老農圃。未害樂堯舜。士生要弘毅。病在墮驕吝。得喪纔幾何。哀哉以身徇。平生最耐事。霜雪亦滿鬢。憂患一洗空。吾道其少進。

幽居

幽居人迹稀。柴扉晝常掩。小池清見底。疎雨時數點。蟬嘒秋未衰。花房暮先斂。老大固多傷。年華還冉冉。山居食每不肉戲作。

谿友留魚不忍烹。直將蔬糲送餘生。二升甗粟香炊飯。一把畦菘淡煮羹。莫笑開單成淨供。也能捫腹作徐行。秋來更有堪誇處。日傍東籬拾落英。

自笑

諸公袞袞幾金貂。自笑無材負聖朝。老氣醉中猶跌宕。閑身夢裏亦逍遙。舊書日伴吾兒讀。薄飯時從野叟招。病後秋衣須早製。竹窗殘夜雨蕭蕭。

世上

世上悠悠東逝波。金丹將奈鬢絲何。牆頭楊柳知秋早。窗外芭蕉受雨多。伏櫪自應如老驥。還鄉元欲借明駝。吾碁一局千年事。從使旁觀爛斧柯。

夜歸偶懷故人獨孤景略

買醉村場半夜歸。西山落月照柴扉。劉琨死後無奇士。獨聽荒雞淚滿衣。

秋夜自近村歸

江頭浩歌天宇寬。刺船歸來清夜闌。女貞林黑月未上。姑惡聲悲村已寒。不恨故交日零落。本知浮生難控搏。頭童面槁更安往。莫問傍人君自看。

夜聞蟋蟀

布穀布穀解勸耕。蟋蟀蟋蟀能促織。州符縣帖無已時。勸耕促織知何益。安得生世當成周。一家百畝長無愁。綠桑鬱鬱暗微徑。黃犢叱叱行平疇。荆扉續火明煜煜。黍壠饅飯香浮浮。耕亦不須勸。織亦不須促。機上有餘布。盎中有餘粟。老翁白首如小兒。鼓腹擊壤相從嬉。

秋夜風雨暴至

風聲掠野來。瀕洞如翻濤。雨聲集庭木。桐葉聲最豪。殘暑一洗空。凜然念綈袍。秋穀已登場。欲忘終歲勞。東舍捉鵝鴨。西舍烹豚羔。籬落開寒花。房櫳壓小槽。貧賤何所歎。樂歲成吾高。卻拾牆角粃。拂拭賀汝遭。月下小酌

草樹已秋聲。郊原喜晚晴。風生雲盡散。天闊月徐行。下箸槎頭美。傳盃甕面清。追歡猶可勉。徂歲不須驚。鄰曲有未飯。被追入郭者。憫然有作

吾廬

春得香秔摘綠葵。縣符急急不容炊。君王日御金華殿。誰誦周家七月詩。吾廬鏡湖上。傍水開雲扃。秋淺葉未丹。日落山更青。孤鶴從西來。長鳴掠沙汀。亦知常苦飢。未忍吞糲糶。我食雖不肉。七箸窮芳馨。幽窗燈火冷。濁酒倒殘瓶。

飲酒望西山戲詠

太白十詩九言酒。醉翁無詩不說山。若耶老農識幾字。也與二事日相關。

小院

小院回廊夕照明。放翁宴坐一筇橫。銅匱暖徹香初過。鐵杵聲清藥欲成。世事熟看無一可。古人不作與誰評。新涼社酒家家熟。使用陽狂了此生。

發篋得故人書有感

衰鬢星星換舊青。世間萬事但堪驚。晨炊欲熟客未覺。夜漏漸殘人尙行。花發且爲無事飲。詩成非復不平鳴。京華朋舊凋零盡。忽見緘題似隔生。

秋光

年年最愛秋光好。病起逢秋合賦詩。叢菊漸黃人醉後。孤燈初暗雨來時。舊書細讀猶多味。老態相尋似有期。早信爲農勝覓祿。一生虛作虎頭癡。

晚秋風雨

儘道漁村陋。秋來物色奇。寒生沽酒興。雨及種花時。狂舞欲誰屬。清吟空自知。茫茫宇宙內。吾道竟何之。

幽居

白髮蕭蕭僅到肩。一枝藤杖日翩躚。草苫牆北棲雞屋。泥補橋西放鴨船。心似枯葵空向日。身如病櫟孰知年。放懷却有條然處。不養金丹不學禪。

又

面面秋山擁翠屏。天留三畝著雲扃。迎霜南阜楓林赤。飽雨西村菜甲青。散策人驚衰後健。浩歌自覺醉中醒。凌煙冠劍應無爾。布帽補襦老管寧。

故山

功名莫苦怨天慳。一櫂歸來到死閑。傍水無家無好竹。卷簾是處是青山。滿籃箭茁瑤簪白。壓擔稜梅鶴頂殷。野興盡時尤可樂。小江煙雨趁潮還。鏡湖。

又

禹祠行樂盛年年。繡轂爭先罷畫船。十里煙波明月夜。萬人歌吹早鶯天。花如上苑常成市。酒似新豐不直錢。老子未須悲白髮。黃公壚下且閑眠。禹祠。

又

老尉鴻飛隱市門。千年猶有舊巢痕。陸生於此寓棋局。予二十年前嘗寓居。曾丈時來開酒樽。曾丈謂文清公。渺渺帆檣遙見海。冥冥蒲葦不知村。數僧也復投詩社。零落今無一二存。梅山。

又

落磡泉奔舞玉虹。護丹松老臥蒼龍。霜柑籬角寒初熟。野碓雲邊夜自舂。挈榼人沽村市酒。打包僧趁寺樓鐘。幽尋自是年來嬾。枉道山靈不見容。雲門。

秋晚弊廬小葺一室過冬欣然有作

放翁畢竟合躬耕。剩喜東歸樂太平。碧瓦新霜寒尚薄。明窗嫩日雨初晴。素琴尋得無絃曲。野餉烹成不糝羹。更說市朝癡太絕。一湖秋水濯塵纓。

小室晚酌



病不禁寒怯早霜。東齋隨事具盃觴。清時寬大何妨醉。白首龍鍾未減狂。枝葉扶檠山果熟。鹽醃調適野蔬香。興闌徑覓華胥路。枕藉圖書滿一床。

冬晚山房書事

山澤何妨老太平。巉巖骨相本來清。月明滿地看梅影。露下隔溪聞鶴聲。未辨藥苗逢客問。欲酬琴價約僧評。胡奴仁祖今俱絕。且學湘纍拾菊英。

又

屏迹山村病日增。烏皮几穩得閑凭。凍雲傍水封梅萼。嫩日烘窗釋硯冰。歲盡光陰饒袞袞。身閑醉夢且騰騰。蠻童采藥歸來晚。客至從噴喚不應。

村居日飲酒對梅花醉則擁紙衾熟睡甚自適也

江村歲晚掩柴荆。地僻久無車馬聲。孤寂惟尋麴道士。一寒仍賴楮先生。醞頭珠滴愁先破。帳底春回夢易成。莫笑衰翁殺風景。小瓶梅蕊解卿卿。

山居疊韻

禽吟陰森林。鹿伏樸樹木。嗚呼吾徒愚。僕僕逐肉粟。聯翩憐鳶肩。覆餗速戮辱。艱難還山間。獨欲足畜牧。躋梯棲西谿。築屋宿北谷。光芒常當藏。櫝玉觸俗目。

寓歎

心已忘斯世。天猶活此翁。嫩湯茶乳白。軟火地爐紅。課婢耘蔬甲。呼兒下釣筒。生涯君勿笑。聊足慰塗窮。

又

久矣門無客。高齋獨掩扉。敢言消壯志。要是息危機。清露夜自滴。孤雲寒不歸。晨炊勿關念。更典篋中衣。

又

裘薄便冬暖。簞空畏午飢。臨成乞米帖。看入借車詩。學古心猶壯。憂時語自悲。公卿闕自重。社稷欲誰期。

卷第二十二

贈惟了侍者

水邊剝啄打門誰。滿袖清風一紙詩。驚起放翁蝴蝶夢。半窗寒日欲斜時。

又

雪中僵臥不須悲。徹骨清寒始解詩。一等人間閑草木。月窗君看早梅枝。

題湖邊旗亭

春色初回杜若洲。佳人又典鷓鴣裘。八千里外狂漁父。五百年前舊酒樓。渡口遠山顰翠黛。天邊新月挂瓊鉤。回頭笑向紅塵說。也有閑愁到此不。

醉臥道邊覺而有賦

太華五千仞。天台四萬丈。一枝古藤如黑龍。天遣飄然寄閑放。莫怪公卿不我知。我目不知渠是誰。史書弄筆後來事。繡鞍寶帶聊兒嬉。旗亭爛醉官道臥。醒後無人數吾過。世間恩怨一時空。且免它年送臨賀。

寓懷

脫粟未爲飢。短褐未爲寒。衆毀心自可。身困氣愈完。茆屋雖三間。跣坐則已寬。濁酒不滿瓢。浩歌有餘歡。祿食妻子樂。功名後人看。成敗兩蝸角。貴賤一鼠肝。茫茫百年夢。底物堪控搏。不如學餐霞。駐此雙頰丹。行披終南雲。飛渡黃河湍。巋然過空城。人言古長安。霜露蒙荆榛。喟然增永歎。

又

蒼壁與黃琮。初非俗所貴。粲然薦纁藉。可對越天地。我豈賣餅兒。自銜三家市。持槃叫道邊。雖售無乃媿。文章等卜祝。王公以儒戲。書成藏名山。此是千載事。

又

我昔浮滄溟。浩渺難具論。華夷澆不辨。日月互吐吞。神龍忽上騰。尾鬣風霆奔。積浪自生火。烈焰焚乾坤。笑謂同舟子。世豈無鵬鯤。聊持豪逸氣。壓汝破碎魂。

又

鮑魚載沙丘。鹿馬獻阿房。泗上老亭長。仿佯起東方。干戈暗寓縣。黥徒化侯王。富貴誠可慕。菹醢亦足當。青門獨無恙。種瓜亦何傷。後有阮嗣宗。絕識未易量。楚漢真豎子。孰謂斯人狂。

喜事

武夷老子雪垂肩。喜事何曾減少年。鸚鵡螺深翻細浪。辟邪爐暖起微煙。幽花滴露霑紗帽。亂絮憑風撲畫船。虎豹九關君勿歎。未妨一笑住壺天。

甜羹菘蘆服山藥芋作羹。

山廚薪桂軟炊秔。旋洗香蔬手自烹。從此八珍俱避舍。天蘇陋味屬甜羹。

縱筆

文叔一人知此翁。洛陽城裏又春風。讓他綠髮好年少。二十四歲作三公。

又

一紙除書到海邊。紫皇賜號武夷仙。功名敢道渾無意。暫作閑人五百年。

又

背上嵯峨兩肉山。明駝有債自須還。玉霄峯頭雪。匱鹿。清曉一聲煙雨間。

又

素月徘徊牛斗間。天風吹鶴度函關。一年似此佳時少。喚起陳搏醉華山。

自嘲解嘲

世變真難料。吾癡只自嘲。移山謀畚土。黏日欲煎膠。得句題修竹。烹茶拾墮巢。行年不須算。斷是死衡茆。

又

種稻稽山下。誅茆剡曲傍。鳴雞耐昏早。飛燕異炎涼。古劍寒三尺。殘書亂一床。穹穹與厚厚。能識我非狂。

春雨絕句

恰喜西窗晚照明。虛簷又報雨來聲。端憂不用占龜兆。壞盡花時自解晴。

又

千點猩紅蜀海棠。誰憐雨裏作啼粧。殺風景處君知否。正伴鄰翁救麥忙。

又

天公似欲敗蠶麤。雨冒南山暮不收。駭女癡兒那念此。貪看科斗滿清溝。

又

今年春半不知春。飛雹奔雷嚇殺人。縫得春衫元未著。免教惆悵洛陽塵。

又

梅中最晚是緇梅。一日來看欲百回。俗紫凡紅終避舍。不妨自向雨中開。

又

蕭條冬令侵春晚。浙瀝寒聲滴夜長。更事老翁頑到底。每言宜睡好燒香。

雨中臥病有感

病臥窮山白髮新。不堪風雨過中春。歌呼空倚一尊酒。零落漸無吾輩人。千載詩書成長物。兩京宮闕委胡塵。非熊老子不復見。誰弔遺魂清渭濱。

舟中作

不遷比景戍交河。三徑歸來得已多。應俗愈疎身老大。讀書漸廢意蹉跎。閑從孫叟蘇門嘯。醉和荆卿易水歌。歌罷却揮孤櫂去。石闌干下買漁蓑。石闌干在剡縣道中。

山園

買得新園近釣磯。旋營茆棟設柴扉。山經宿雨修容出。花倚和風作態飛。世事只成驚老眼。酒徒頻約典春衣。狂吟爛醉君無笑。十丈愁城要解圍。

聞虜亂

運數羣胡盡。煙塵北道昏。百年身易老。萬里志空存。楊柳搖馳道。櫻桃奉寢園。南公忠義薄。此恨與誰論。

題千秋觀懷賀亭

河湟使典珥左貂。曲江相君謝不朝。宮中玉環狐作妖。黠虜旁窺心已驕。天維欲絕地軸搖。有識凜凜憂宗祧。賀公託言師松喬。黃冠徑歸侶漁樵。老馬立仗不自聊。去如鸞鳳冲煙霄。傾都祖餞擁渭橋。賢哉大夫脫塵囂。揚州渡江木蘭橈。入東夜聽錢塘潮。我來故祠竹蕭蕭。黃冠野服傳生綃。詞卑媿匪英瓊瑤。空采蘋藻奠桂椒。虛堂斷香閉寂寥。遺魂零落何由招。

禹祠

我昔下三峽。南賓繫歸艫。渡江謁神禹。拜手薦俎壺。壽藤枝如虬。巨柏腹若劓。門庭雖日荒。殿寢猶枝梧。巴俗喜禱祠。解牛舞羣巫。巍巍黻冕古。食與夷鬼俱。聖度固兼容。臣憤獨不攄。還鄉瞻廟貌。羸政久已除。撇牧儼如生。想像聞都兪。廓清雖可喜。欲退復躊躇。念昔平水土。棋布畫九區。豈知千歲後。戎羯居中都。老虜失大刑。今復傳其雛。直令挽天河。未濯腥羶汙。夷鬼細事耳。披攘直須臾。天下讎不復。大恥何時祛。蚩蚩謂固然。此責在吾徒。揮涕灑庭草。誰憐小臣愚。

樊江

手中一卷養魚經。又向樊江上草亭。朝雨染成新漲綠。春煙澹盡遠山青。榜舟不厭頻來往。岸幘常須半醉醒。賦罷新詩自高詠。滿汀鷗鷺欲忘形。

東關

路入東關物象奇。角巾老子曳筇枝。蠶如黑蟻桑生後。秧似青鍼水滿時。穿市不嫌微雨溼。過谿翻喜壞橋危。當年野店題詩處。又典春衣具午炊。

又

雲蹙魚鱗襯夕陽。放翁繫纜水雲鄉。一筇疾步人驚健。斗酒高歌自笑狂。風暖市樓吹絮雪。蠶生村舍采桑黃。東阡南陌無窮樂。底事隨人作許忙。

練塘

微風吹頰酒初醒。落日舟橫杜若汀。水秀山明何所似。玉人臨鏡暈螺青。

娥江市

小聚依江近。支流入浦分。荒寒孤店雨。零亂野祠雲。薄餉炊畬粟。珍烹采澗芹。年來去健羨。摩腹自欣欣。

宿野人家

避雨來投白版扉。野人憐客不相違。林喧鳥雀棲初定。村近牛羊暮自歸。土釜煖湯先濯足。豆豔吹火旋烘衣。老來世路渾諳盡。露宿風餐未覺非。

舟中遣懷

三黜歸來結草廬。平生狂態掃無餘。但思下帷授老子。那復騎牛讀漢書。歷歷舊遊渾似夢。蕭蕭殘髮不勝梳。閑中事業君知否。不把漁竿卽荷鋤。

歸次樊江

芳草東西路。綠楊長短亭。人生豈匏繫。吾志本鴻冥。征袖朝霑雨。歸帆夜戴星。長魚幸能買。且復倒殘瓶。

夜過魯墟

中夜過魯墟。船底鳴細浪。月出菱歌長。林闌續火壯。故居不可識。四顧但青嶂。百年幾廢興。撫事一悽愴。士生本耕稼。時來偶卿相。功名亦餘事。所勉在素尚。况吾多難者。久已冥得喪。微祿行當辭。沒身事幽曠。

有感

溫洛榮河拱舊京。從來人物富豪英。報仇雖有楚三戶。守節得無齊二城。胡寇寧能斷地脈。王師行復暢天聲。鳳麟久伏應爭奮。勉爲明時頌太平。

遊石帆玉笥石旗諸山

暮景苦多病。幽尋寄一欣。溪喧常似雨。石潤易生雲。天迴回鴉陣。林疎過鹿羣。莫談朝市事。吾老厭紛紛。

信步近村

端閑何以永今朝。拈得筇枝度野橋。三畝空園喧啄木。十尋高樹絡凌霄。長飢未必緣詩瘦。多悶惟須賴酒澆。興盡歸來又陳迹。一林風葉暮蕭蕭。



寒食省九里大墓

陌上簫聲正賣錫。監輿兀兀雨冥冥。人來平野一點白。山壓亂雲千疊青。石馬朱門松下路。凍齋冷飯柳陰亭。華顛尙記兒童日。撫事興懷涕自零。

平水道中

處處陂水滿。家家巢燕忙。葉舒桑漸闌。穗重麥初昂。高下山花發。青紅粉餌香。亦知時節好。老大自悲傷。  
五雲橋往時。鏡湖陂防不廢。則若耶溪水常滿。可行大舟至雲門。此橋本跨溪上。今乃在平陸矣。  
若耶北與鏡湖通。縹緲飛橋跨半空。陵谷變遷誰復識。我來徙倚暮煙中。

小雨雲門溪上

好雨疎疎壓暮埃。斷雲漠漠帶春雷。離黃穿樹語斷續。翠碧銜魚飛去來。生菜入盤隨冷麩。朱櫻上市伴青梅。狂吟不是誇強健。老氣如山未許摧。

雲門獨坐

山北山南處處行。回頭六十七清明。如今老去摧頽甚。獨坐焚香聽水聲。

泛湖至東涇

春水六七里。夕陽三四家。兒童牧鵝鴨。婦女治桑麻。地僻衣巾古。年豐笑語譁。老夫維小艇。半醉摘藤花。

又

湖光分別浦。嶺路過前村。泉石相縈帶。雲煙互吐吞。耕犁無易業。隣曲有通婚。試覓誅茆地。吾將遺子孫。

又

細細桃枝竹，疎疎篔簹眼。籬雪霜燒葑，夜月露采菱。時腰斧登山早，移罾出浦遲。關心盡幽事，恨汝不能詩。

舟過梅塢胡氏居愛其幽邃爲賦一詩

稽山翠入家家窗，此家清絕無與雙。丹葩綠樹錦繡谷，清波白石玻璃江。一堤茂草有眼犢，數掩短籬無吠龙。北軒商略可散髮，借與放翁傾酒缸。

北窗

北窗本意傲羲皇，老返園廬味更長。犢健戴星耕白水，蠶飢衝雨采青桑。但儒朱墨開冬學，廟史牲牢祝歲穰。從此鬢毛雖似雪，未妨擊壤頌虞唐。

聞蛙

科斗忽安在，蛙聲豪有餘。雖成兩部樂，恨失一編書。忿怒緣何事，號呼可奈渠。廚人不退棄，猶得伴溪魚。

晚春感事

風惡房櫳燕子歸，雨多山路蕨芽肥。青衿旋擣作寒食，白葛預裁充暑衣。穉子日長供課早，故人官達寄書稀。幽居自喜渾無事，又向湖陰坐釣磯。

又

和風薄靄過清明，減盡重裘覺體輕。正午軒窗無樹影，乍晴阡陌有鶯聲。釀成西蜀鵝雛酒，鷄黃廣漢酒名。煮就東坡玉糝羹，捫腹翛然出門去。春郊何處不堪行。

又

徙倚闌干送落暉。年華冉冉恨依依。護雛燕子常更出。著雨楊花又嬾飛。已爲讀書悲眼力。還因攬帶歎腰圍。親朋半作荒郊冢。欲話初心淚滿衣。

又

少年騎馬入咸陽。鶻似身輕蝶似狂。蹴鞠場邊萬人看。鞦韆旗下一春忙。風光流轉渾如昨。志氣低摧只自傷。日永東齋淡無事。閉門掃地獨焚香。

山居

平生杜宇最相知。遺我巢山一段奇。茶磴細香供隱几。松風幽韻入哦詩。溪邊拂石同兒釣。竹下開軒喚客棋。幾許放翁新事業。不教虛過太平時。

四月三日同子坦子聿遊湖中諸山

我行無所詣。悠颺信舴艋。愛此綠樹村。捨棹度小嶺。路窮忽披豁。恍然得異境。蒼玉立萬峯。清鏡渺千頃。更爲西南行。聊破春晝永。遙看秀邃處。疑足事幽屏。一崦果可人。奇石插碧井。鏘鳴若環珮。其味復甘冷。徘徊不忍去。照我鬚鬢影。須臾日穿林。井面光炯炯。古今勝絕意。正用一笑領。安得絕世喧。於茲慕箕穎。

梅仙塢小隱

綠樹陰陰小嶺西。一翁二子自扶攜。雨前芳嫩初浮盃。臘脚清醇旋拆泥。本欲省緣行買餅。未能去殺尙烹雞。二者皆紀是日實事。弄撓莫使尋歸路。湖靜無風日未低。

盟雲

謂雲本無心。企望乃爾奇。謂雲果有心。百變端爲誰。豈憐此翁愁。一出怡悅之。橫截千嶂平。高擎一峯危。銀城突嵯峨。玉海浩渺瀾。或爲羣龍矯。或作孤鶴飛。卷舒閑有態。去來倏無時。滃滃覆松頂。靄靄映水湄。帶雨過僧窗。和月傍釣磯。豈惟困畫工。吾詩固難追。惟當與之盟。畢世相娛嬉。忍飢固易耳。此友不可欺。

示兒

舍東已種百本桑。舍西仍築百步塘。早茶采盡曉茶出。小麥方秀大麥黃。老夫一飽手捫腹。不復舉首號蒼蒼。讀書習氣掃未盡。燈前簡牘紛朱黃。吾兒從旁論治亂。每使老子喜欲狂。不須飲酒徑自醉。取書相和聲琅琅。人生百病有已時。獨有書癖不可醫。願兒力耕足衣食。讀書萬卷真何益。

村居初夏

暮境難禁日月催。臘醅初見拆泥開。壓車麥穗黃雲卷。食葉蠶聲白雨來。薄飯蕨薇端可飽。短衫紵葛亦新裁。宦塗自古多憂畏。白首爲農信樂哉。

又

北陌東阡節物新。往來饋餉走比鄰。出籠鵝白輕紅掌。藉藻魚鮮淡墨鱗。笑語相聞豐歲樂。耕桑自足古風淳。頽然一醉茆簷下。且免西曹議吐茵。

又

煮酒開時日正長。山家隨分答年光。梅青巧配吳鹽白。筍美偏宜蜀豉香。風暖緊催蠶上簇。雨餘閑看稻

移秧老夫見事真成晚。浪走人間兩鬢霜。

又

天遣爲農老故鄉。山園三畝鏡湖傍。嫩莎經雨如秧綠。小蝶穿花似繭黃。斗酒隻雞人笑樂。十風五雨歲豐穰。相逢但喜桑麻長。欲話窮通已兩忘。

又

故鄉風物勝荆吳。流水青山無處無。列植園林多美果。飽鉏畦壟富嘉蔬。橋邊來淬剝桑斧。池畔行芟縛糶菰。我有素紈如月扇。會憑名手作新圖。

城東逆旅

店家乞火燎征衣。溼竹生薪不受吹。更甚從戎戍邊日。正如隨計入關時。百年擾擾夢相似。萬事悠悠心自知。賴有牀頭周易在。不妨清坐忍朝飢。

江村初夏

紫葢狼藉桑林下。石榴一枝紅可把。江村夏淺暑猶薄。農事方興人滿野。連雲麥熟新食麩。小裹荷香初賣鮓。蘋洲蓬艇疾如鳥。沙路芒屨健如馬。君看早朝塵撲面。豈勝春耕泥沒踝。爲農世世樂有餘。寄語兒曹勿輕捨。

舟中作

湖海飄然避世紛。汀鷗沙鷺舊知聞。漁舟臥看山方好。野店沾嘗酒易醺。病骨未成松下土。老身常伴渡

頭雲美芹欲獻雖堪笑。此意區區亦愛君。

東關

天華寺西艇子橫。白蘋風細浪紋平。移家只欲東關住。夜夜湖中看月生。

又

煙水蒼茫西復東。扁舟又繫柳陰中。三更酒醒殘燈在。臥聽蕭蕭雨打篷。

少微山

平生一舸艤。幾到少微山。傑觀掃無迹。高人呼不還。崖崩危欲壓。磴斷滑難攀。日暮增幽興。漁歌莽蒼間。

舟行至織女潭

艤枝搖碎碧琉璃。織女潭東白塔西。帶犢吳牛依茂樹。添巢海燕啄新泥。山谿曲折遙通谷。沙水淙潺各赴溪。猶恨兒曹不同載。一尊他日要重攜。

書歎

溲落非時用。棲遲送此生。只知求醉死。何憚得狂名。伏櫪天涯老。吞舟海澨橫。眼前交舊盡。有淚對誰傾。

小園獨立

草香無處覓。花嫩不禁飛。澤國春歸晚。柴門客過稀。新泥添燕戶。細雨溼鶯衣。倚杖臨階久。衰翁氣力微。

觀蘇滄浪草書絹圖歌

天孫獨處河之湄。龍梭夜織冰蠶絲。機頭剪落光陸離。騎鯨仙人醉題詩。字大如斗健欲飛。利刃猛斫生

蛟螭墨渴字燥尤怪奇。百彪潛影神靈悲。嗚呼東雲作筆兮。海爲硯。激水一騰龍野戰。乾坤震蕩人始驚。筆未落時誰得見。

睡起書觸目

壓架藤花重團枝。杏子稠。渴蜂窺硯水。弱燕集簾鈎。入夏暑猶薄。投閑身自由。午窗初睡起。幽興付茶甌。  
曉雨初霽

夏雨

連朝暑溽不可過。動地忽有東北風。嵯峨雲壓世界碎。天矯龍卷江湖空。塵沙洗濯草木醒。溝澮激澗舟舸通。更煩造物出壯觀。跨海千丈垂天虹。

自東涇度小嶺聞有地可卜菴喜而有賦

小嶺西南煙水間。頗聞有地百弓寬。誰其云者兩黃鵠。何以報之雙玉盤。竹塢未昏先晻曖。蓮汀當暑亦清寒。一菴何日從吾好。會約高人共倚闌。

露坐

五月暑猶薄。中庭試葛衣。蛙聲經雨壯。螢點避風稀。塵念三生誤。歸心半世違。殘年端有幾。可復負漁磯。

自笑

自笑胸中抵海寬。韭齋麥飯日加餐。住山緣熟塵機息。養氣功深槁面丹。惡路慣曾經澀滌。浮生何啻夢

邯鄲鏡湖五月秋蕭爽。剩傍灘頭把釣竿。

夜賦

夜窗搔首髮鬢髻。病不勝衣倚瘦藤。堪笑顏回忍飢面。常依韓愈看書燈。殘生已與灰俱冷。舊友誰如兒可憑。月落風生忽增氣。掠簷勁翮有歸鷹。

書懷

老死已無日。功名猶自期。清笳太行路。何日出王師。

醉後作小草因成長句

天教老去未全衰。猶欠縱橫萬首詩。家近將軍觴詠地。身如太史滯留時。酒翻銀浪紅螺醖。墨涌玄雲紫玉池。流落不妨風味在。花前醉草寫烏絲。

雨中作

空濛初喜灑欄楹。忽聽空階點滴聲。高枕便知宜夕睡。豐年不歎負春耕。多情幽草沿牆綠。無賴羣蛙繞舍鳴。屈指清秋兩句近。却愁徂歲又崢嶸。

詠史

入郢功成賜屬鏤。削吳計用載廚車。閉門種菜英雄事。莫笑衰翁日荷鋤。

登鵝鼻山至絕頂訪秦刻石且北望大海山路危甚人迹所罕至也

街頭旋買雙芒屨。作意登山殊不惡。蒼崖無罅竹鞭逸。崩石欲墜松根絡。憑高開豁快送目。歷險崎嶇危



著脚川雲忽起兩蛟舞。瀑水高吹萬珠落。大巖空腔誰所剝。絕壁峭立端疑削。坡平或可坐百人。峽束僅容飛一鶴。蛇踐岌岌頭自眩。鬼谷慘慘神先愕。秦皇馬迹散莓苔。如鑄非鑄鑿非鑿。殘碑不禁野火燎。造物似報焚書虐。人民城郭俱已非。煙海浮天獨如昨。

六七月之交山中涼甚

城市方炎熱。村墟乃爾涼。拂窗桐葉下。繞舍稻花香。獨鶴警秋露。雙螢明屋梁。臥聞機婦織。感歎夜初長。

幽居

大患元因有此身。百年強半走踈踈。折殘廣武城邊柳。染盡洛陽衣上塵。繞樹鶻孤棲漸穩。支床龜老息初勻。出門不欲摩雙眼。世態年來又一新。

又

百頃菰蒲古澤中。老夫病起恰秋風。流年不貸人皆老。造物無私我自窮。市隱昔曾從嘯父。山栖今欲效園公。芳樽雖匪金丹術。槁面尊前也暫紅。

又

煙水重重際海涯。夜深風雨耿蒹葭。交朋散落歡娛少。憂患侵陵志氣衰。癡腹何由有鱗甲。俗情自未去毛皮。詩書六十餘年夢。更擬傳衣付小兒。

園中雜詠

藝花本無多。過眼那復遺。陰陰一園綠。佳處乃在茲。悠然東窗下。願與枕簟宜。風輕竹解籜。雨足果壓枝。



